

कां खडरसीं खापरीं वाढिलें । वाढूनि राति चौहटां सांढिलें ।
 तेथ सुणेयांचां ऐसें जालें । जेया परीं ॥ ३५ ॥
 तैसें भक्तिहानाचें जीणें । कां संपत्ति ही न सुकृत जाणणें ।
 तें संवसारदुःखासि अवंतणें । उगारिलें गा ॥ ३६ ॥
 हणौनि कुल उत्तम नोहावें । जाती अंत्यां हीं होआवें ।
 वरि देहाचेनि नावें । पशु ही लाभो ॥ ३७ ॥

मां हि पार्थ व्यपाश्रित्य येऽपि स्युः पापयोनयः ।

स्त्रियो वैश्यास्तथा शूद्रास्तेऽपि यांति परां गतिम् ॥३८॥

पाहें पां सावजें हातिरुं धरिलें ।
 तेणें तिया काकुलती मातें स्मरिलें ।
 किं तियाचें पशुत्व वावो जालें ।
 पातलें मातें ॥ ३८ ॥
 आगा नावं घेतां ओखटी । जे आघविया अधमाचां सेवटी ।
 तिये पापयोनीं हीं किरीटी । जन्मले जे ॥ ३९ ॥
 ते पापयोनि मूढ । मूर्ख जैसे दगड ।
 परि माझां ठांडं दड । सर्वभावें ॥ ४० ॥
 जेयांचिये वाचे माझे आलाप । दीठि भोगी माझे चि रूप ।
 जेयांचें मनसंकल्प । माझे चि वाहे ॥ ४१ ॥
 माझेया कीर्त्ताविण । जेयांचे रीते नाहीं श्रवण ।
 जेयां सर्वांगा भूषण । माझी सेवा ॥ ४२ ॥
 जेयांचें ज्ञान विषो नेणे । जाणिवो मज चि एकातें जाणे ।
 जेयांसि ऐसें लाभें तरि जीणें । यन्हविं मरण ॥ ४३ ॥
 ऐसां आघवां चि परीं पांडवा । जिहि आपुलेयां सर्वभावां ।
 जियावेया लागि ओलावा । मीं चि केला ॥ ४४ ॥
 ते पापयोनी हीं होतु कां । ते श्रुताधीत न्हवतु कां ।
 पारि मासिं तूंकितां तूका । तूटि नाहिं ॥ ४५ ॥

पाहे पां भक्तिचेनि आधिलेपणे । दैत्ये देवां आणिले उणे ।
 माझे नृसिंहत्व लेणे । जेयाचिये महिमे ॥ ४६ ॥
 तो प्रन्हादु गा मजसाठी । घेतां बौहे सदा किरीटी ।
 कां जें मियां देयावें तें गोठी । तेयाचिया जोडे ॥ ४७ ॥
 येन्हविं दैत्यकुल साचोकारे । परि इंदु ही सारि न लाहे उपरे ।
 ह्यर्णानि भक्ति गा एथ सरे । जाति अप्रमाण ॥ ४८ ॥
 राजाज्ञेचीं अक्षरे आधि । तिये चर्मा एका जेया पडति ।
 तेया चर्मा साठीं जोडति । सकला ही वस्तू ॥ ४९ ॥
 बांचूनि सोनें रूपें प्रमाण नोहे । एथ राजाज्ञा समर्थ आहे ।
 तें चर्म चि एक जें लाहे । तेणें वीकेति आघवीं ॥ ४५० ॥
 तैसें उत्तमत्व तैं तरे । तैं चि सर्वज्ञता सरे ।
 जैं मनोबुद्धि भरे । माझेनि प्रेमें ॥ ५१ ॥
 ह्यर्णानि कुलें जाती वर्ण । हें आघवें चि गा अकारण ।
 एथ अर्जुना माझेपण । सार्थक एक ॥ ५२ ॥
 तैं चि भलेतेणें भावें । मना मज आंतु एणें होआवें ।
 आलें तरि आघवें । मार्गील तें वाओ ॥ ५३ ॥
 तैसें तव चि वाहला वोहल । जव न पवति गंगाजल ।
 मग होउनि ठाकति केवल । गंगारूप ॥ ५४ ॥
 कां खरचंदन काष्टें । हे विवंचना तव चि घटे ।
 जव न घपति येकावटे । अग्नी माझि ॥ ५५ ॥
 तैसें क्षत्री वैश्य स्त्रिया । कां शूद्र अंत्यादि इया ।
 जाती तव चि वेगलालिया । जव न भजति मातें ५६ ॥
 मग जाती व्यक्ती पडे बिंदुलें । जेव्हां भाव होंति मज मीनले ।
 जैसे लवणकण घातलें । सागरावारि ॥ ५७ ॥
 तव चि नदानदीचीं नावें । तव चि पूर्वपश्चिमें तेयां धात्रे
 जव नैथेति आघवे । समुद्रापासिं ॥ ५८ ॥

हैं चि कण्हणें येकें मिसें । चित्त माझां ठांडं प्रवेशे ।
 एतुलें हो मग आपैसें । मी होणें असें ॥ ५९ ॥
 आगा वर फोडावेया चि लागि ।
 लोह मीलो कां परिसाचां आंगीं ।
 कां जें मिलैल इये प्रसंगीं ।
 सोनें होईल ॥ ४६० ॥
 पाहे पां वालभाचेनि व्याजें । तियां वज्रांगनाचिं नीजें ।
 मज मीनलेयां काइ माझे । स्वरूप नो होंती चि ॥ ६१ ॥
 ना तारि भियाचेनि मीसें । मातें न पविजे चि काइ कसें ।
 किं अखंडें बैरावेशें । चेंद्यादिकिं ॥ ६२ ॥
 आगा सोइरेपणें चि पांडवा । माझे सायुज्य एयां यादवां ।
 पै ममत्वे वसुदेवा— । दिकां सकलां ॥ ६३ ॥
 नारदा ध्रुवा अक्रूरा । शुका हान सनत्कुमारा ।
 ऐयां भक्ती मी धनुर्द्धरा । प्राप्यु जैसा ॥ ६४ ॥
 तैसा चि गोपीसीं सकामें । तेया कंसा भयसंभ्रमे ।
 एरां घातकें मनोधमे । शिशुपालां ॥ ६५ ॥
 आगा मी एकु लाणिचें खागें । मज एउं ये भलेतेणें मार्गें ।
 भक्ती कां विषयवैरागें । अथवा वैरें ॥ ६६ ॥
 झगौनि पाई । प्रवेशावेया माझां ठांडं ।
 उपायांची नाहिं । केणि एथें ॥ ६७ ॥
 आणि भलेतिये जाती जन्मावें । मग भजिजो अथवा विरोधावें ।
 परि भक्तां कां वैरियां होआवें । माझेयां चि ॥ ६८ ॥
 आगा कण्हणें येकें बोलें । माझेपण जरि जालें ।
 तरि मीं होणें आलें । हाता निरुतें ॥ ६९ ॥
 झुयां लगि पापयोनी अर्जुना । कां वैश्य शुद्र अंगना ।
 येणें मातें भजतां सद्गना । माझेयां येति ॥ ४७० ॥

किं पुनर्ब्राह्मणाः पुण्या भक्ता राजर्षयस्तथा ।

अनित्यममुखं लोकमिमं प्राप्य भजस्व माम् ॥ ३३ ॥

मग वर्णा माक्षि छत्रचामर । स्वर्गु जेयाचें अप्रहार ।

मंत्रविद्येसि माहेर । ब्राह्मण जे ॥ ७१ ॥

जे पृथ्वीतलिचे देव । जे तपावतार सावयव ।

सकल तीर्थासि दैव । उदैलें जे ॥ ७२ ॥

जेथ अखंड वसिजे यागि । वेदांची जे वज्रांगी ।

जेयांचिये दीठिचां उत्संगी । मंगल वाढे ॥ ७३ ॥

जेयांचिये आस्थेचेनि बोलें । सत्कर्म पाहालिं गेलें ।

संकल्पें सत्य जियालें । जेयांचेनि ॥ ७४ ॥

जेयांचेनि गा बोलें । आगिसि आयुष्य जालें ।

ह्मणौनि समुद्रें पाणी आपुलें । दीधलें प्रीती ॥ ७५ ॥

मियां लक्ष्मी हीं केली परौति ।

फेड्ढनि कौस्तुभ घेतला हातीं ।

मग बोटवली वक्षस्थलाची वाग्वती ।

चरणरजा जेयाचेया ॥ ७६ ॥

आमूं पाउलांची मुद्रा । मीं उरीं वाहें जे सुभद्रा ।

आपुलेया दैव समुद्रा । जतने लागि ॥ ७७ ॥

जेयांचा कोपु सूभटा । कालाग्निरुद्राचा बसैठा ।

जेयांचां प्रसादीं फूकटा । जोडति सिद्धी ॥ ७८ ॥

ऐसे पुण्यपुंज ब्राह्मण । आणि माझां ठाईं अतिनिषण्ण ।

आतां मातें पावति कवण । समर्थणें ॥ ७९ ॥

पाहे पां चंदनाचेनि अंगानीलें । सीतलें निंब होंते जे जवले ।

तिहिं निजीवीं हीं देवांचिं निडलें । बैसणीं केलीं ॥ ८० ॥

मग तो चंदनु तेथ न पवे । एसें मनीं चि कैसेनि धरावें ।

अथवा पातला हें समर्थवें । तेन्ही काड साच ॥ ८१ ॥

तेथ निववील ऐसिया आशा । हरें चंद्रमा आधा ऐसा ।
 बाहिजत असे शिरसा । निरंतर ॥ ८२ ॥
 तेथ निवविता आणि सगला । परिमलें चंद्राहूनि अंगला ।
 तो चंदनु काइ स्वलीला । सर्वांगि न बैसे ॥ ८३ ॥
 कां रथ्योदकें जिये जिये कासे ।
 लागलेयां समुद्र जालीं अनायासें ।
 तियें गंगेसि काहीं अनारिसें ।
 गत्यंतर असे ॥ ८४ ॥
 ह्यणौनि राजर्षी हान ब्राह्मण । जेयां गती मती मीं चि शरण ।
 तेयां विशुद्धी मीं चि निर्वाण । स्थिति ही मीं ॥ ८५ ॥
 एया लागि शतजर्जरे नावे । रिगौनि निश्चंता होआवें ।
 कैसेनि उघडलेयां असावें । शस्त्रवर्षि ॥ ८६ ॥
 आगा वरिपडतां पापाण । न सुवावें केवि ओडण ।
 रोगि दाटिला आणि उदासपण । उष्वधेसीं ॥ ८७ ॥
 जेथ चहूंकडे जलतसे वणवा ।
 तेथौनि कैसेनि न निगिजे पांडवा ।
 तेवि लोका एउनि एया सोपद्रवा ।
 केवि न भजिजे मातें ॥ ८८ ॥
 आगा मातें न भजावेया लागि । कवण बळ पां आपुले आंगि ।
 काइ घरि किं भोगिं । निश्चंत केलें ॥ ८९ ॥
 ना तारे विद्या किं वयसा । एया प्राण्यांसि हा ऐसा ।
 मज न भजतां भवसा । सुखाचा जाला ॥ ९० ॥
 तारि भोग्यजात जितुलें । तें एकाचि देहाचेया नीके लागलें ।
 आणि एथं देह तवं असे पडिलें । कालाचा तोंडी ॥ ९१ ॥
 वापा दुःखाचें केणें सूटलें । जेथ मरणाचें भरें लोटलें ।
 तिये मृत्युलोकाचिये असे घडलें । हाटवेंले एणें ॥ ९२ ॥

आतां सुखेंसिं जीविता । कैसी ग्राहकै कीजैल पांडुसुता ।
 काइ राखोंडिया फूंकितां । दीपु लागे ॥ ९३ ॥
 आगा विषाचे कांदे वाट्टनि । गोरसु घेइजे पीडनि ।
 तेया नाव अमृत ठेउनि । जैसैं अमरां होणें ॥ ९४ ॥
 कां सीस खांडूनि आपुलें । पायांचां खतीं बांधलें ।
 तैसैं मृत्युलोकिचें भलें । आहे आघवें ॥ ९५ ॥
 हणौनि मृत्युलोकि सुखाची काहाणी ।
 आइकैजैल कवणाचां श्रवणीं ।
 कैची सुखनिद्रा आंधुरणीं ।
 इंगलांचां ॥ ९६ ॥
 जिये लोकिंचा चंद्र क्षयरोगी ।
 जेथ उदो होये अस्तवावेया चि लागि ।
 दुःख लेउनि सुखाची आंगी ।
 सलित जगतें ॥ ९७ ॥
 जेथ मंगलाचां अंकुरीं । सवें चि अमंगलांची आहे पोहोरी ।
 मृत्यु उदयाचां परिवरीं । गर्भ गिवसी ॥ ९८ ॥
 जीतें नाहिं तेयाचें चितवी । तव तें चि नेइजे गंधर्वी ।
 गेलेयाची कव्हणी गावीं । शुद्धि न लभे ॥ ९९ ॥
 आगा गिवसितां आघवां वाटीं ।
 परतलें पाउल चि नाहिं किरीटी ।
 सैध निमालेयांचिया गोठी ।
 तियें पुराणें जेथिचीं ॥ ५०० ॥
 जेथिचिये अनित्यतेची थोरी । करितेया ब्रह्मेयाचें आयुष्यवेन्हीं ।
 कैसैं होणें नाहिं अवधारीं । निपटूनियां ॥ १ ॥
 ऐसी लोकिची इये नांदणुक । तेथ जन्मले आहाति जे लोक ।
 तेयांचिये निश्चंतैयेचे कें कवतिक । दीसतसे ॥ २ ॥

पैं दृष्टादृष्टिचिये जोडी । भांडवला न सुटे कवडी ।
 जेथ सर्वस्वें हाणि तेथ कोडी । वेचितील ॥ ३ ॥
 जो बहू इयें विषयविलासीं गूंपे ।
 तो ह्मणे उवाई पडिलां सांपें ।
 जो अभिलाषाभारें दडपे ।
 तेयातें सज्ञानु ह्मणति ॥ ४ ॥
 जेयाचें आयुष्य धाकुटें होण । बल प्रज्ञा जिरौनि जाए ।
 तेयाचे नमस्कारजति पाण । वडील ह्मणौनि ॥ ५ ॥
 जवं जवं श्वान बलिया वाढे । तवं तवं भोजें नाचति कोडें ।
 आयुष्य निमालें आंतुलीकडे । ते ग्लानि नाहिं ॥ ६ ॥
 जन्मलेया दिहें दिवसें । हों लागे कालाचेया ऐसें ।
 किं वाढतीं कारिति उल्हासें । उभिति गुढिया ॥ ७ ॥
 अगा मर हा बोलु न सांहांति । आणि मेलेयां तरि रडति ।
 पारि असतें जींत न गणिति । गैसासै पैं ॥ ८ ॥
 दर्दुरु सापें गीलजतु उभा । तो मासिया वेंटाली जीभा ।
 तैसे प्राणिये कवणा लोभा । वाढविति तृष्णा ॥ ९ ॥
 आहा कटा उल्खटें । हें मृत्युलोकिचें उपराटें ।
 एथ अर्जुना जन्हें अवचटें । जन्मलासि ॥ ५१० ॥
 तन्हें झडझडौनि बहिला निग । इये भक्तीचिये वाटे लाग ।
 जीया पावसी अव्यंग । निजद्वाम माझें ॥ ११ ॥

मन्मना भव मद्भक्तो मद्याजी मां नमस्कुरु ।

मामेवैष्ण्यसि युक्तस्त्वैवमात्मानं मत्परायणः ॥ ३४ ॥

तूं मन हें मीं चि करीं । माझां भजनीं प्रेम धरीं ।
 सर्वत्र नमस्करिं । मज एकातें ॥ १२ ॥
 माझेनि अनुसंधानें देख । संकल्प जालणें अशेख ।
 मद्याजी ह्मणपे चोख । तें यया नावं ॥ १३ ॥

ऐसा मियां आथिला होसी । तेय माझिया चि स्वरूपा येसी ।
 हें अंतर्कराणिचें तुसीं । बोलिजत असे ॥ १४ ॥
 आगा आववेया चोरिया आपुलें ।
 जें सर्वस्व आक्षि असे ठेविलें ।
 तें पावौनि सुख सांचलें ।
 होउनि ठांसी ॥ १५ ॥
 ऐसेनि सावलेनि परब्रह्म । तेणें भक्तकामकल्पद्रुमें ।
 बोलिलें आत्मारामें । संजयो ह्मणे ॥ १६ ॥
 अहो आइकत असा अवधारा ।
 तव एया बोला निवानु ह्मांतारा ।
 जैसी ह्यैसी नुठी कां पुरा ।
 तैसा उगला चि असे ॥ १७ ॥
 तेथें संजयें माथा तूकिला । आहा अमृताचा पाउसु वरिषला ।
 हा एथ चि असतु गेला । सेजेया गावां ॥ १८ ॥
 तन्हें दातारु हा आमचा । ह्मणौनि ऐसें बोलतां मेलैल वाचा ।
 काइ जालें एयाचा । भोगू चि ऐसा ॥ १९ ॥
 परि बापु भाग्य माझें । जें वृत्त सांघावेयाचेनि व्याजें ।
 कैसा रक्षिला मुनिराजें । व्यासदेवें ॥ २० ॥
 एतुलें हें वाडें सायासें । जवें बोलतसें दृढें मानसें ।
 तव न धरे चि आपुलेया ऐसें । सात्विकिं केलें ॥ २१ ॥
 चित्त वाबठेलें आठौ घेंत । वाचा पांगुलैली जेथिची तेथ ।
 आपणचेंचुकित । रोमांचीं जालें ॥ २२ ॥
 अश्रोन्मीलित डोले । वरिषताति आनंदजलें ।
 आंतुला सुखोर्माचेनि बलें । बाहिरि कांपे ॥ २३ ॥
 पै अक्षिचें चि रोममूर्ती । आलां स्वेदकर्णीं निर्मलीं ।
 लेइलां मोतियांची कडियाली । आवडे तैसा ॥ २४ ॥

ऐसा महासुखाचेनि अतिरसें । जेथ आटणी होईल जीवदसे ।
 तेथ निरोविलें व्यासें । ते नेदी चि हों ॥ २६ ॥
 आणि कृष्णार्जुनांचें बोलणें । घोकारि आलें श्रवणें ।
 किं देहस्मृतिचा तेणें । वापसा केला ॥ २६ ॥
 तेव्हां नेत्रिचें जल विसर्जो । म्हा सर्वांगिचा स्वेदु परिमार्जो ।
 तेवि च ह्मणे अवधारा हां जी । धृतराष्ट्रातें ॥ २७ ॥
 आतां कृष्णवाक्यबीजा निवाडु । आणि संजयो सात्विकाचा विवाडु ।
 ह्मणौनि सवयां चि होईल सुरवाडु । प्रमेयपिकाचा ॥ २८ ॥
 अहो अलुमालु अवधान देआवें । इतुलेनि आनंदरासिवारि बैसवें ।
 बापु श्रवणेंद्रियांचेनि दैवें । घातली माल ॥ २९ ॥
 ह्मणौनि विभूतिचा ठाओ । अर्जुना दावील सिद्धांचा राओ ।
 तो आइकां ह्मणे ज्ञानदेओ । निवृत्तिचा ॥ ३० ॥

अंतस्तदिति श्रीमद्भगवद्गीतासूपनिषत्सु ब्रह्मविद्यायां

योगशास्त्रे श्रीकृष्णार्जुनसंवादे राजविद्यावर्णनं

नाम नवमोऽध्यायः ॥

॥ श्रीकृष्णार्पणमस्तु ॥



ज्ञानेश्वरी

अध्याय दहावा

ॐ नमो भगवते गणेशाय ॥

ॐ नमो विशदबोधविदग्धा । विद्यारविंदप्रबोधा ।
परापरमप्रमदा । विलासिया ॥ १ ॥
नमो संसारतमसूर्या । अप्रमिता परमवीर्या ।
तरुणतमतूर्या । ललनलीला ॥ २ ॥
नमो जगदखीलपालणा । मंगलमणीनिधाना ।
सज्जनवनचंदना । आराध्यलिंगा ॥ ३ ॥
नमो चतुरचकोरचंद्रा । स्वानुभावनरेन्द्रा ।
श्रुतिसागरसमुद्रा । मन्मथमन्मथा ॥ ४ ॥
नमो सुभावभजनभाजना । भवेभकुंभभंजना ।
विश्वोद्भवभुवना । गुरुराया ॥ ५ ॥
तुमचा अनुग्रहो गणेशु । जैसा आपुला दे सौरसु ।
तैं सारस्वतीं प्रवेशु । बालका आधि ॥ ६ ॥
जी दैविकी उदारा बाचा । जै राजादेशु दे नाभिकाराचा ।
तारि नवरसदीपिचा । पाउडु लाभे ॥ ७ ॥
आपुलें स्नेह ते चि वागीश्वरी । जेया मुक्यातें अंगिकरी ।
तो वाक्स्पतिसीं करी । प्रबंभ्रहोडा ॥ ८ ॥

हां हो एकांची पाठी चि तपनली । एकिं मृष्टिपरि मृष्टि ॥ ३५ ॥
 एकिं पाखाणि वासनि उहरचिलि । तमुद्रां कटकें ॥ ३६ ॥
 एकिं आकाशीं सूर्यातें धरिलें । एकिं चूलीं चि समुद्रा शोखिलें ।
 तैसें तुझीं मजकरविं बोलविलें । अन्नधारि जो ॥ ३६ ॥
 परि असो हें एथ ऐसें । रामु रावणु जूझिनले कैसे ।
 ना रामु रावणु जैसे । मीनळे समरीं ॥ ३७ ॥
 तैसें नवमींचें श्रीकृष्णाचें बोलणें ।
 आणि नवमींचेया चि ऐसें मी ना हणें ।
 यया निवाडु तत्त्वजु जाणे ।
 जेवां गीतार्थु आयि ॥ ३८ ॥
 एवं नवै अध्याय पहिले । मियां मतीसारिखे बोलिले ।
 आतां उत्तरखंड आदरिलें । ग्रंथिचें आइकां ॥ ३९ ॥
 तेथ विभूति प्रतिविभूति । प्रस्तुत अर्जुनां साविजली ।
 ते विदग्धा रसवृत्ती । ह्यणिपैल कथा ॥ ४० ॥
 देशियेचेनि नागरपणें । शांतु शृंगारातें जीणे ।
 बोविया कीं होंति लेणें । साहियासि ॥ ४१ ॥
 मूलग्रंथिचेया संस्कृता । सर्वे नीट मन्हाटीं पढतां ।
 अभिप्राचें मानलेया उचिता । कवणि भूमिका ते म्हेणजे ॥ ४२ ॥
 जैसें आंगिचेनि सौंदर्यपणें । लेणेयांसि आंग चि होयें लेणें ।
 तेथ अलंकरलें कवण कवणें । हें निवर्चेना ॥ ४३ ॥
 ऐसी देशी आणि संस्कृत वाणी । एकां भावाचां लुखासमीं ।
 शोभती ते आणि । चोखटा आइकां ॥ ४४ ॥
 उदैलेयां भावा रूप । करितां लागे रसवृत्तिचें वडप ।
 चातुर्य ह्यणे हें पडप । जेडलें आइकां ॥ ४५ ॥
 तैसें देशियेचें लगण्य । हरौनि रसां आणिजेल सारण
 मग ह्यणिपैल लगण्य । मीतास्तन ॥ ४६ ॥

। श्रीकृष्णवाक्य ॥

भूय एष महाबाहो भृशु मे परमं वचः ।

वत्सेऽहं प्रियमाणाय वक्ष्यामि हितकाम्यया ॥ ४१ ॥

तं वि चराचरपरमगुरु । चतुरचित्तचमत्कार ।

तों आइकां यादवेश्वर । काइ बोलता जाला ॥ ४७ ॥

ज्ञानदे० निवृत्तिच सणे । ऐसें बोलिलें हरी-तेणें ।

अइकैं अर्जुना अंतःकरणें । नीकेया परीं ॥ ४८ ॥

आसि मागां जें निरूपण केलें । अवधान चि गा तूणें तूकलें ।

परि टांचें न्हवे भले । पुरतें आहे ॥ ४९ ॥

घटिं थोडें ऐसें द्रव घालीजे । न गलिजे तरि मागुता मरिजे ।

तैसा पाहिलासि तब परिसविजे । ऐसें होतसे ॥ ५० ॥

पहिलें अवधितेयावारि सर्वस्व सांडिजे ।

मग चोखु तरि भांडारी कीजे ।

तैसा आतां बिंदीटी माझें ।

निजधाम पैंगा ॥ ५१ ॥

ऐसें अर्जुना एउतें सर्वेश्वरें । पाहूनि बोलिलें आदरें ।

गिरि देखूनि सुभरें । मेघु जैसा ॥ ५२ ॥

तैसा कृष्णलुवांचा राओ । सणे आइकैं गा महाबाहो ।

सोषितला चि अभिप्रा० । लांघिजेल पुढुतीं ॥ ५३ ॥

प्रतिवारिषि क्षेत्र पेरिजे । जवं जवं पीकाची वाढि देखिजे ।

बालासि नुभणिजे । बाहो करितां ॥ ५४ ॥

पुढुतीं पुढुतीं पुढें । मोंगारा देतीं ऊटें ।

तरि तें उखटें । सणों नैये किं ॥ ५५ ॥

तैसा एथ पार्था । तुज आभार नाहिं सर्वथा ।

आसि आपुलेया चि स्वार्था । मोलांनु पुढुतीं ॥ ५६ ॥

आंगीं बोलक लेवविजे लेबें । तें त्रिगारासि काइ जावें ।

बुद्धिर्ज्ञानमसंमोहः क्षमा सत्यं दमः शमः ।

सुखं दुःखं भयो भावो मयं चाभयमेव च ॥ ४ ॥

प्रथमं जीणं बुद्धिः । मगं ज्ञानं जे निरवधी ।

असंमोहो सहनसिद्धी । क्षमा सत्य ॥ ८१ ॥

मगं शम दम दोन्ही । सुखदुःख वर्ते जे जनी ।

जन्मविनाशु मानी । भावांमाक्षि ॥ ८२ ॥

अहिंसा समता तुष्टिस्तपो दानं यशोऽवशः ।

भवंति भावा भूतानां मत्त एव पृथग्विधाः ॥ ५ ॥

पै भय आणि निर्भयता । अहिंसा हान समता ।

तुष्टि तप पांडुमुता । दान जे गा ॥ ८३ ॥

आगा येश कां अपकीर्ति । हे भाव जे वर्त्तति ।

ते मज चि पासाव होति । भूतांचां ठाई ॥ ८४ ॥

जैसी भूते आहाति सिनानी । तैसें हें वेगलालें मानी ।

एक उपजत माक्षां ज्ञानी एक नेणति माते ॥ ८५ ॥

प्रकाशु आणि कडवसें । हें सूर्या चि पासौनि जैसं ।

प्रकाशु उदयीं दीसे । तम अस्तुसर्वे ॥ ८६ ॥

आणि माते जाणणें नेणणें । तें भूतांचेया दैवांचें करणें ।

ज्ञानी भूते भावांचें होणें । विप्रम पडे ॥ ८७ ॥

इयापरीं माक्षां भावि । हे जीवसृष्टि आचवी ।

गुंतली असे जाणावी पांडुकुमरा ॥ ८८ ॥

आणि इये सृष्टिचे पालक । जेयां आघीन वर्त्तति लोक ।

ते अक्ररा भाव आणिक । सांचेन आहक ॥ ८९ ॥

महर्षयः सप्त पूर्वे चत्वारो मनवस्तथा ।

मज्जाया मानसा जाता येषां लोक इमाः प्रजाः ॥ ६ ॥

तीर आघवेयांसि वृद्ध । महर्षीमाक्षि प्रबुद्ध ।

कश्यपादि प्रसिद्ध । सत्तरिधि ॥ ९० ॥

आणिक ही सांगितली । चौदावांत मुदल ।
 स्वयंभु मुख्य वडिल । चारि मनु ॥ ९१ ॥
 ऐसे हे मकरा । माती मतीं साळे जन्तुवरा ।
 सृष्टिकेया ज्ञापाय । लागींभियां ॥ ९२ ॥
 जें लोकाचें व्यवस्थे न मडे । अहंभावाचा पैकु न मडे ।
 जें महाभूतस्यें दळवाडें । अचुंबित आहे ॥ ९३ ॥
 तें चि हे आले । मग इहीं लोक केले ।
 तेथ अक्षय होउनि ठेले । तेयांचे जन ॥ ९४ ॥
 लष्मिनि अकरा हीं राजां । एर जग यांचिया प्रजा ।
 एवं विश्वविस्तार माझा । ऐसा जाण ॥ ९५ ॥
 पाहे पां आरंभी बीज एकलें । तें चि विरुढलेयां बूढ जालें ।
 बुढीं कोंभ फूटके । खोदियांचे ॥ ९६ ॥
 खोदियांप्रसौनि देखां । फूटलिया शाखा ।
 शाखातव देखीं । फळव पानें ॥ ९७ ॥
 पालवीं फूल फल । ऐसा वृक्ष होये सकल ।
 तें निर्द्वारजे जव केवल । तव बीज चि आषवें ॥ ९८ ॥
 तैसें मी पहिलें । मग माझे मन तें वियालें ।
 तेथ सप्तर्षी जाले । आणि च्यान्ही मनू ॥ ९९ ॥
 तिहि विविध लोक सृजिले । लोकीं लोकपाल वेगळाले ।
 लोकपालि उपजविले । प्रजाजात ॥ १०० ॥
 ऐसेनि विश्व हे एथें । मीं विस्तारलां हे निरुतें ।
 भावांचेनि हाते । मानसाचेया ॥ १ ॥

एतां विभूर्ति योगं च मम यो वेत्ति तत्त्वतः

सोऽधिकंपन्न योगेन युज्यते नात्र संशयः ॥ ७ ॥

यालागि वै सुमंदापती । हे भाव माझिया विभूती ।

आणि येमा व्याधी । व्यापले जग ॥ २ ॥

ह्यणानि मां यापरी । मज लागौनि पिपीलिकावन्हा ।
 मीवांचूनि दूसरी । गोठि नाहिं ॥ ३ ॥
 ऐसें जाणे जो साचें । तेया चवरे जालें ज्ञानाचें ।
 ह्यणानि उत्तमाधमभेदाचें । स्वप्न हि न देखे ॥ ४ ॥
 मी माक्षिया विभूती । आणि विभूती अभिष्टिलिया ल्यक्ती ।
 हें आघवें योगप्रतीती । इयेची मानी ॥ ५ ॥
 ह्यणानि निःशकें योगें । मज मीनला मनाचेंनि आंगें ।
 तेंथ संशयो करणें न लगे । त्रिशुद्धा जाण ॥ ६ ॥

अहं सर्वस्य प्रभवो मत्तः सर्वं प्रवर्तते ।

इति मत्वा भजते मां बुधा भावसमन्विताः ॥ ८ ॥

जैसें सूर्यें सूर्यातें वात्रालिलें । कां चंद्रें चंद्रेमेयांसि खेवं दीधलें ।
 ना तरि सरिसेन पांडें मीनलें । दांन्ही बोध ॥ ७ ॥
 तैसें प्रयाग होत सामरस्याचें । वरि ३० साण तरंगत आहे सात्विकाचें ।
 ते संवादचतुःपथिचें । गणेश जाले ॥ ८ ॥

मन्विता मद्रतप्राणा बोधयंतः परस्परम् ।

कथयंतश्च मां नित्यं तुष्यन्ति च रमन्ति च ॥ ९ ॥

तेव्हां तेया महासुखाचेनि भरे । धाडनि निगति बोधें बाहिरे ।
 मिया धाले तेणें उद्गरे । लागति गजों ॥ ९ ॥
 ते गुरुशिष्यसंबंधु येकाती । जेया अक्षरा एकाची वदती ।
 ते मेघाचेयापरी त्रीजगती । गर्जत असे ॥ ११० ॥
 जैसी कमलकलिका जालेपणें । हृदयीचेया मकरंदातें राहीं नेणें ।
 ते राया रंका करी पारणें । आमोदाचें ॥ ११ ॥
 तैसें मातें विश्विं कथित । कथितेनें तोखें कथू विसरत ।
 मग तेया विसरलेयामाक्षि विरत । आंगें जीवें ॥ १२ ॥
 ते प्रेमाचेनि बौहवसणें । नाहिं रात्रि दियो जाणणें ।
 केव्ही माझे चि मुख आवडणें । आपणपेयांसि जिहि ॥ १३ ॥

तेषां सततयुक्तानां भर्जतां प्रीतिपूर्वकम् ।

ददामि बुद्धियोगं तं येन मामुपयान्ति ते ॥ १० ॥

तेयां मग आझीं काहीं । अर्जुना देयावें पाई ।

तें ठांईचि चि तिहिं । सेल घेतली ॥ १४ ॥

कां ते जिया बाटा । निगाले गा सूभटा ।

ते सोये पां येउनि अव्हांटा । स्वर्गापवर्ग ॥ १५ ॥

सणौनि तिहिं प्रेम धरिलें । तें चि देणें येयां उपाइलें ।

परि यां देआवें तें इहीं चि केलें । आपणपें चि पै ॥ १६ ॥

एयावरि एतुलें घडे । जें तें चि प्रेम आगलें वाढे ।

आणि कालाची दीठि न पडे । हें साम्य करणें ॥ १७ ॥

ललेयाचिया बालका किरीटी ।

गवसणी घाल्लु आपलेया स्नेहाची दीठी ।

जैसी खेलतां पाठोवाटी ।

माता निहाली ॥ १८ ॥

तें जो जो खेलु दावी । तो तो सोनेयाचा करुनि ठेवी ।

तैसी उपास्तीची पदवी । मी पोरवीतु जायें ॥ १९ ॥

जिये पदवियेचेनि पोरवकें । ते मातें पावति सुखें ।

हे पालति मज विशेपें । करु आवडे ॥ २० ॥

आगा या विश्वासि मी माझें कोड ।

मज त्रेयां अनन्यगतीची चाड ।

कां जें प्रेमलांचें सांकड ।

आमचां घरीं ॥ २१ ॥

पाहे पां स्वर्ग मोक्ष उपाइले ।

दोन्ही मार्ग तेयाचिया चि वाहाणी आहाति ठेविले ।

आझीं आंग शोषा वेचिलें ।

लक्ष्मीयेसि ॥ २२ ॥

परि आपणपें जें एक । तें सवियां बरवें साजूक ।
 प्रेमलांलागि देख । ठेविलें जतनें ॥ २३ ॥
 हा ठावो वेन्हीं किरिटी । आहिं प्रेमल वेओं आपणपेयांसाठी ।
 इया बोलिं या बोलिजति गोठी । तैसिया न्हवति ॥ २४ ॥

तेषामेवानुक्तपार्थमहमज्ञानजं तमः ।

नाशयाम्यात्मभावस्थो ज्ञानदीपेन भास्वता ॥ ११ ॥

क्षणौनि मज आत्मेयांचा भाउ । जिहिं जियाविया केला ठाउ ।
 एकु मीवांचूनि एरु वाउ । केलें जिहीं ॥ २५ ॥
 तेया तत्वज्ञाना चोखटा । दिवी पोतासाची सूभटा ।
 मग मी चि होउनि दीवटा । पुढां चालें ॥ २६ ॥
 अज्ञानाचिये राती । माजि तमाची मेहुडीं दाटती ।
 तियें नाशौनि घालीं परौती । ऐसा उदो करीं ॥ २७ ॥
 ऐसें प्रेमलांचेनि प्रियोत्तमें । बोलिलें पुरुषोत्तमें ।
 तेथ अर्जुनु मनोधर्मे । निवालां क्षणे ॥ २८ ॥

अर्जुन उवाच ।

परं ब्रह्म परं धाम पवित्र परमं भवान् ।

पुरुषं शाश्वतं दिव्यमादिदेवमजं विभुम् ॥ १२ ॥

अहो जी अवधारां । भला केरु फाटला सवंसारा ।
 जालां जननीजठरा । वेगला मी ॥ २९ ॥
 जी जन्मलपण आपुलें । आजि मिया डोलां देखिलें ।
 आतां जी जीवित हातु चढलें । आवडे तैसें ॥ ३० ॥
 आजि सुविद्ये सुवर्ण जाली । माझेया दैवांसे दशा उदैली ।
 जें वाक्यकृपा लाधली । दैविकेनि मुखें ॥ ३१ ॥
 ऐणें वचनतेजकरें । फिटलें आंतु बाहीरील आंधारें ।
 क्षणौनि देखतसें साचोकारें । स्वरूप तूजें ॥ ३२ ॥
 तरि होंसि गा तूं परब्रह्म । जेयां महाभूतांसि विश्राम ।

तें मित्रद्वय प्रवित् परम । जगन्नाथा ॥ ३३ ॥
 तूं परमदेवत तीहीं देवां । तूं पुरुष जी पंचविंसांवा ।
 दिव्य तूं प्रकृतिभावां । पैलीकडीलु ॥ ३४ ॥
 अन्नादि सिद्ध तूं स्वामी । नाकलिजमि जन्मकर्मी
 तो तूं हें अजि आर्ह्यां । जाणीतलासी ॥ ३५ ॥
 तूं कालयंत्रा सूत्री । तूं इये जीवकले अधिष्ठात्री ।
 तूं ब्रह्मकटाहधारी । हें कललें फुडें ॥ ३६ ॥

आहुस्त्वामृषयः सर्वे देवर्षिर्नारदस्तथा ।

असितो देबलो व्यासः स्वयं चैव ब्रवीषि मे ॥ १३ ॥

पैं आणिकि ही एकीपरी । इयाची प्रतीति एतसे धोरी ।
 जें मागां ऐसें चि रिशीश्वरीं । सांघितलें तूतें ॥ ३७ ॥
 तें सांघितलेयाचें साचपण । हें देखत असे अंतष्करण ।
 जें कृपा केली आपण । लणौनियां ॥ ३८ ॥
 यन्हर्वि नारदु अखंड जवला आहे ।
 तो ऐसीं चि वचनें गाये ।
 परि अर्थु न बुझों ठाये ।
 गीत चि आइकों ॥ ३९ ॥
 जी आंधलेयाचां गावीं । जन्हीं आपणपें प्रकटलें रवी ।
 तर्हि वीतपली चि तेयां होआवी । वांचूनि प्रकाशु नाहीं ॥ ४० ॥
 यन्हर्वि देवरिषि अध्यात्म गांतां । आहाच रागेंसि उमटतां ।
 तें चि परिसवे येर चित्ता । नैये काहीं ॥ ४१ ॥
 पैं असिता देवलाचेनि मुखें । मीं येवविधु तूतें आइकों ।
 परि तें बुद्धि विषयविषें । धारली होती ॥ ४२ ॥
 आतां आणिकाचें नावें काइ घेयावें । आपण एउनि व्यासदेवें ।
 तूतें स्वरूप आघवें । सर्वत्र सांघिजे ॥ ४३ ॥
 देवा आंधारी चित्तमणि देखिल्या । जेवि न्हये लणौनि उचेंदिला ।

पाठि दीनउदो मोटका जाला । मग होये क्षणे ॥ ४४ ॥
 तैसि व्यासादिकांची बोलणी । तिया मजपासी रत्नाचिया क्षाणी ।
 परि उपेखया जांति वायाणी । तुजवीण देवा ॥ ४५ ॥
 आतां वाक्यसूर्यकर फांकलें । आणि रिखि मार्ग होंति जे कथिले
 तेयां आघवेयांचें फीटलें अनोलखपण ॥ ४६ ॥
 जीवनाचें बीं जेयांचे बोल । परि माक्षियेठांइ पडिले खोल ।
 तें इये कृपेची जाली बोल । क्षणौनि संवाद फलेंसि उठिलें ॥ ४७ ॥
 कृष्णसंवादें । फूलीं आलें मकरंदें ।
 ते फूल विनोदें । दीन्हलें मज ॥ ४८ ॥
 आहो नारदादिकां संतां । तेयांचिया जुतीस्वरूप सारिता ।
 मीं महोदधि जालां अनंता । संवादसुखाचा ॥ ४९ ॥
 प्रभू आघवेनिं जन्में । जियें पुण्यें केलीं मियां उत्तमैं ।
 तेयां न टकती चि कामें । सद्गुरू तुवां ॥ १५० ॥
 एन्हविं वडिलांचेनि मुखें ।
 एवंविधु तूतें आइकें ।
 परि कृपा न कीजे चि तुवां एकें ।
 तव नेणिजे चि काहीं ॥ ५१ ॥
 क्षणौनि भाग्य जैसैं सानुकुल । जालेयां जैसे उद्यम सफल ।
 तैसैं श्रुतादि सकल । गुरुकृपा साच ॥ ५२ ॥
 जी बनकरु झाडांसाठीं । पाहूनि जन्में काढी आटी ।
 परि फलेंसीं तैं भेटी । जैं वसंतु पावे ॥ ५३ ॥
 आहो जैं विषयां वोहटु पडे । जैं माधूर्य आवडे ।
 रसायनें तेव्हलि होंति गोडें । जैंव्हलि आरोग्यता होये ॥ ५४ ॥
 कां इन्द्रियें वाचा प्राण । यांचें जालेयां सार्थकपण ।
 जैं चैतन्य एउनि आपण । संचरे माझि ॥ ५५ ॥
 ऐसैं शब्दजात आलोडिलें । अथवा योगादिक अभ्यासिलें ।

तैं तैं चि हणों ये आपुलें । जैं आज्ञा देंति गुरु ॥ ५६ ॥

सर्वमेतदृतं मन्ये यन्मां वदसि केशव ।

नहि ते भगवन्त्यक्तिं विदुर्देवा न दानवाः ॥ १४ ॥

ऐसिये जालिये प्रतीतीचेनि माजें । अर्जुनु निश्चयाचि नाचतु भोजें ।

तेवि चि हणें देवा तूझें । वाक्य मज मानलें ॥ ५७ ॥

तारि साच चि गा कैवल्यपती । मज त्रिशुद्धी आलें प्रतीती ।

जें तूं देवांदानवांचिया युक्ती । जो गा न्हवसि ॥ ५८ ॥

तूझीं वाक्यें न लगति देवा । जैसैं आपुलेया जाणिजसि जाणिवा ।

तें काहि नाहिं हें सद्भावा । भवसेनि आलें ॥ ५९ ॥

स्वयमेवात्मनात्मानं वेत्थ त्वं पुरुषोत्तम ।

भूतभावन भूतेश देवदेव जगत्पते ॥ १५ ॥

एथ आपुलें वाडपण जैसैं । आपण चि जाणिजे आकाशें ।

मीं येतुली घनवट ऐसैं । पृथ्वी नेणे ॥ ६० ॥

तैसा आपुलियां सर्वशक्ती । तूं जाणसि लक्ष्मीपती ।

एर वेदादिक मती । मिरवती प्रज्ञा वायां ॥ ६१ ॥

हां गा मनातें मागें सांडावें । पवनातें वावीं मवावें ।

आदिशून्य तें उतरांनि जावें । केउतें बाहीं ॥ ६२ ॥

तैसैं तुझें जाणणें आहं । हणौनि कोण्हा हीं टाकतें नोहं ।

आतां तूझें ज्ञान हांये । तुज चि जोगें ॥ ६३ ॥

जी आपणेयातें तूं चि जाणसि । आणि सांघावेया समर्थु होसि ।

तरि एकु वेलु घामु पूसी । आर्त निडलिचा ॥ ६४ ॥

हें आइकिलेया किं भूतभावना । त्रिभुवनपंचानना ।

सकलदेवदेवतार्चना । जगन्नाथा ॥ ६५ ॥

जरि धोरी तूझी पांत आहें । तरि पासि उभे ठाकवेया योग्यु नोहें ।

इया शोध्यतः ॥ भियें । तरि उपाऊं नाहीं आनु ॥ ६६ ॥

वक्षुमर्हस्यशेषेण दिव्या ह्यात्माविभूतयः ।

यामिर्विभूतिभिर्लोकानिमांस्त्वं व्याप्य सिद्धसि ॥ १६ ॥

भरले सरिता समुद्र चहूंकडे । परि बापैयांसि गा कोरडे ।

जै मेघौनि धेंबटा पडे । तै पारणें तेया ॥ ६७ ॥

तैसें गुरु सर्वत्र असति । परि कृष्णा तू चि आह्लासिं गति ।

विभूती सांघें ॥ ६८ ॥

जी तूक्षिया चि विभूती । तिया चि परिव्यक्ती ।

दिव्या जिया आहाति । तिया दाविं मातें ॥ ६९ ॥

जिहिं विभूति समस्तां । लोकांतें व्यापूनि अससि अनंता ।

तिया ब्रह्मनामांकिता । प्रकटा करीं ॥ १७० ॥

कथं चिद्यामहं योगिंस्त्वां सदा परिचितयन् ।

केषु केषु च भावेषु चिन्त्योऽसि भगवन्मया ॥ १६ ॥

जी मियां कैसें तूतें जाणावें । काइ क्षणौनि सदा चिंतावें ।

जरि चिंतू क्षणों आघवें । तरि चिंतणें न घडे ॥ ७१ ॥

तरि मागां भाव जैसे । सांघितले तुवां उद्देशें ।

आतां विस्तारूनि तैसें । येकु वेळु सांघें ॥ ७२ ॥

जेयां भावांचां टांडें । तूतें चिंतितां मज सायास नाहिं ।

तो विवंचूनि देई । योगु आपुला ॥ ७३ ॥

विस्तरेणात्मनो योगं विभूर्तिं च जनार्दन ।

भूयः कथय त्वसिहिं शृण्वतो नास्ति मेऽमृतम् ॥ १८ ॥

आजिक आपुलिया जिया विभूती ।

तिया ही बोलाविया भूतप्रती ।

एथ क्षणसी पुडुतीं पुडुतीं ।

काइ सांघों ॥ ७४ ॥

तारि हा भावो मना । ज्ञानें हो देसि जनार्दना ।

जैसे करितां अमृतपाना । न लगवे पुरे ॥ ७५ ॥
 जें बालकुटाचें सहोदर । मरणाभेण पियाले अमर ।
 तन्हीं देहाचे पुरंदर । चौदा जांति ॥ ७६ ॥
 ऐसा एकु क्षीराब्धिचा वासु । जेयासि अमृतपणांचा आन्हासु ।
 तेयाचा हा ठावोवोर विश्वासु । जें पुरे लग्णों नेदी ॥ ७७ ॥
 जें मंदराचल न ढलितं । क्षीरसागर न डडुलितं ।
 अनादि स्वभावता । असइतें चि आहे ॥ ७८ ॥
 जें द्रवित नां बद्ध । जेथ नेणिजति रसभेद ।
 भलेतेया ही सिद्ध । आठवलें चि पावे ॥ ७९ ॥
 जेयाची गोडी आवडत खेआं । आववाचि संसारु होये वा३० ।
 बलियां नित्यता लागे प३० । आपणपेयां ॥ १८० ॥
 जन्ममृत्यूची भाष । हारपोनि जाये निःशेष ।
 आंतु बाहिरि महासुख । वाढों चि लागे ॥ ८१ ॥
 मग दैवंगत्या जरि सेविजे ।
 तरि तें आपण चि घेउनि ठाकिजे ।
 तुज ही देतां चित्त माझें ।
 पुरे लग्णों न शके ॥ ८२ ॥
 तारे तूझे नावं चि जी आह्मां आवडे ।
 वरि भेटि होये आणि जवलीक जोडे ।
 पाठि मोठि सांघसी मुरवाडें ।
 सुखाचेनि ॥ ८३ ॥
 आतां हें सुख काइसया सारिखें । काहिं निर्वचेनां परितोखें ।
 परि येतुलें होये जें येणें मुखें । पुनरावृत्ति नाहीं ॥ ८४ ॥
 आगा सूर्य कीं सीला । चंद्रु लग्णों पांतां आंकुचला ।
 नीच वाहांतां गंगाजला । काइ पारिसेपण आहे ॥ ८५ ॥

ययावरि तुहीं बोलिलें । हें आहीं नादासि किं रूप देखिलें ।
आजि चंदनतरुची फूले । तुरुबिलीं आहीं ॥ ८६ ॥

श्रीभगवानुवाच ।

हंत ते कथयिष्यामि दिव्या ह्यात्मविभूतयः ।
प्राधान्यतः कुरुश्रेष्ठ नास्त्यंतो विस्तरस्य मे ॥ १९ ॥

एया पार्थाचेया बोला । सर्वांगिं कुण्णु डोलला ।
हणें भक्तिज्ञानासि जाला । आधार हा ॥ ८७ ॥
ऐसेया प्रीतिकराचेया तांपा आंतु । प्रेमाचा वेगु उपजतु ।
तो सायासें सावरितु अनंतु । काइ बोले ॥ ८८ ॥
जिया जाणितलेया चि साठीं । आववें जाणितलें होये किरिटी ।
जें बीज आलेंयां मुठी । तरु आला चि आहे ॥ ८९ ॥
कां उदारणें हाति पडिलें । तरि आपैसंया चि सांपडलीं फुलें ।
तेवि देखिलेंयां जें देखवलें । विश्व सकल ॥ ९० ॥
मी पितामहाचा पिता । आठवितां नाठवें चित्ता ।
किं हणतसें पांडुसुता । भलें केलें ॥ ९१ ॥
अर्जुनातें हणें येथ काहीं । आह्मा विस्मो करावेया कारण नाहिं ।
तो आंगें लेंकुरुं काइ । न्हवे चि नंदाचें ॥ ९२ ॥
परि प्रस्तुत हें असो । ऐसें करवी आवडिचा अतिसो ।
मग हणें आइकें गा सांघितसों । धनुंधरा ॥ ९३ ॥
तरि तुवां घूसिलिया जिया विभूति । तेयांचें अपारपण सुभद्रापती ।
जें माझिया चि माझिये मती । आकलति ना ॥ ९४ ॥
हणौनि कैसा आहे मीं केवढा ।
पाहातां आपणपेया न्हवे चि फुडा ।
एयालागि प्रधान जिया रुढा ।
तिया विभूति आइकें ॥ ९५ ॥

यन्हविं साच चि गा धनुर्दरा । नाहं अंतु माक्षेया विस्तारा ।
पै गगना ऐसिया अपारा । मज चि माक्षि असणें ॥ ९१ ॥

अहमात्मा गुडाकेश सर्वभूताशयस्थितः ।

अहमादिश्च मध्यं च भूतानामंत एव च ॥ ९० ॥

आइकैं कुटिलालकमस्तका । धनुर्वेद व्यंबका ।

मी आत्मा असें एकैका । भूतमात्राचां ठां ॥ ९७ ॥

आंतुलीकडे मी चि आहे अंतष्करणीं ।

बाहीरि माझी चि गवसणीं ।

आदि मीं निर्वाणीं ।

मध्ये हीं मीं ॥ ९८ ॥

जैसें मेघांसि तलिवारि । एक आकाश चि आंतु बाहेरि ।

आणि आकाश चि जालें अवधारिं । असणेंयासि ॥ ९९ ॥

पाठिं लया जेव्हलि जांति । तेव्हलि आकाश चि होउनि ठांति ।

तेवि आदिस्थितिगति । भूतांसि मीं ॥ २०० ॥

ऐसें बहुवस व्यपकण । माझे विभूतियोमें जाण ।

तारि जीवांचे करूनि श्रवण । सर्व ही आइक ॥ १ ॥

हें बोलौनि तो कृपावंतु । ह्मणे विष्णु मी आदित्या आंतु ।

रवि मियां राखिवंतु । सुप्रभा जो ॥ २ ॥

आदित्यानामहं विष्णुर्ज्योतिषां रविरंशुमान् ।

मरीचिर्मरुतामास्मि नक्षत्राणामहं शशी ॥ २१ ॥

मरुद्रणाचां भागिं । मरीचि ह्मणे मी शार्ङ्गि ।

चंद्र मी गगन रंगीं । तारांमाक्षि ॥ ३ ॥

रुद्राणां शंकरश्चास्मि वित्तेशो यक्षरक्षसाम् ।

वसूनां पावकश्चास्मि मेरुः शिखरिणामहम् ॥ २२ ॥

अशेषां हिं रुद्रगणांमाक्षारि । शंकरु जो मी मदनारि ।

तो मीं गा एथ न करीं । आंति काहीं ॥ ४ ॥

यक्षरक्षगणांआंतु । शंभूचा जो धनवंतु ।

तो कुबेरु मी अनंतु । ह्मणता जाला ॥ ५ ॥

आठां वसूंमाझारि । पावकु तो मीं अवधारी ।

शिखराथिलेयां सर्वां उपरि । मेरु तो मीं ॥ ६ ॥

वेदानां सामवेदोऽस्मि देवानामस्मि वासवः ।

इंद्रियाणां मनश्चास्मि भूतानामस्मि चेतना ॥ २३ ॥

वेदांमाझि सामवेदु । तो मी ह्मणे गोविंदु ।

देवांमाझि प्रसिद्धु । महेंद्रु तो मीं । ॥ ७ ॥

इंद्रियांमाझि अकरावें । मन तें मीं जाणावें ।

भूतांमाझि स्वभावं । चेतना ते मीं ॥ ८ ॥

पुरोधसां च मुख्यं मां विद्धि पार्थ बृहस्पतिम् ।

सेनानीनामहं स्कंदः सरसामस्मि सागरः ॥ २४ ॥

जो स्वर्गसिंहासना साहो । सर्वज्ञते आदिचा ठाओ ।

पुरोहितांमाझि राओ । बृहस्पति मीं ॥ ९ ॥

त्रिभुवानिचेया सेनापती । आंतु स्कंदु तो मी महामती ।

जो हरवीर्यें अग्निसंगति । कृत्तिकां आंतु जाला ॥ २१० ॥

सकलां सरोवरां माझारि जाणसि । समुद्रु तो मीं जलराशि ।

महारिखीं माझि तपोराशि । भृगु तो मीं ॥ ११ ॥

महर्षीणां भृगुरहं गिरामस्येकमक्षरम् ।

यज्ञानां जपयज्ञोऽस्मि स्थावराणां हिमालयः ॥ २५ ॥

अशेषां हीं वाचां । आंतु नडनाचु जेथ सत्याचा ।

तें अक्षर मी वैकुंठिचा । वेल्हालु ह्मणे ॥ १२ ॥

समस्तां हिं यज्ञाचां पैकिं । जपयज्ञु तो मीं इये लोकिं ।

जो कर्मत्यागी कर्मादिकीं । निफजविजे ॥ १३ ॥

स्थावरां गिरिं आंतु । पुण्यपूंज्यु जो हिमवंतु ।

तो मीं ह्मणे कांतु । लक्ष्मीयेचा ॥ १४ ॥

अश्वत्थः सर्ववृक्षाणां देवर्षीणां च नारदः ।

गंधर्वाणां चित्ररथः सिद्धानां कपिलो मुनिः ॥ २६ ॥

कल्पद्रुमु हान पारिजातु । गुणै चंदनु पै विख्यातु ।

तन्है वृक्षजातां आंतु । अश्वत्थु तो मीं ॥ १५ ॥

देवर्षीं आंतु पांडवा । नारदु तो मी जाणात्रां ।

चित्ररथु तो मीं गंधर्वा । सकलां माझि ॥ १६ ॥

अशेषां हीं सिद्धां । माझि कपिलाचार्यु प्रनुद्धा ।

तुरंगमां प्रसिद्धां । माझि उच्चैश्रवा तो मीं ॥ १७ ॥

उच्चैःश्रवसमश्वानां विद्धि माममृतोद्भवम् ।

ऐरावतं गजेंद्राणां नगाणां च नराधिपम् ॥ २७ ॥

राज्यभूषणगजा आंतु । अर्जुना मीं गा ऐरावतु ।

पयोराशि सुमथितु । वियाला जेयातें ॥ १८ ॥

येयां नरा माझि राजा । तो विभूतिविशेष माझा ।

जेयातें सकललोक प्रजा । होउनि सेविति ॥ १९ ॥

आयुधानामहं वज्र धेनूनामस्मि कामधुक् ।

प्रजनश्चास्मि कंदर्पः सर्पाणामस्मि वासुकिः ॥ २८ ॥

पै अशेषां हिं हातियरां । माझि वज्र तें मिं धनुर्देरा ।

जें शतमुखोत्तीर्णकरा । हातीं असे ॥ २२० ॥

धेनू मध्ये कामधेनु । ते मीं क्षणे विश्वेशानु ।

जन्मवितेयां आंतु मदनु । तो मीं चि जाण ॥ २१ ॥

सर्पकुला आंतु अधिष्ठाता । वासुकी तो मीं कुंतीमुता ।

नागां माझि समस्तां । अनंतु तो मीं ॥ २२ ॥

अनंतश्चास्मि नागानां वरुणो यादसामहम् ।

पितृणामर्यमा चास्मि यमः संयमतामहम् ॥ २९ ॥

आगा यादसां आंतु । जो पश्चिमदिशेचा कांतु ।

तो मी क्षणे अनंतु । वरुणु तो मीं ॥ २३ ॥

आगा पितृगणां समस्तां । अर्यमा जो पितृदेवता ।
 तो मीं हें तत्वता । पांडुकुमरा ॥ २४ ॥
 आगा जगाचीं शुभाशुभें लिहिति । प्राणांचा उगणां घेति ।
 मग केलेया अनुरूप देती । स्वर्गमोक्षु जे ॥ २५ ॥
 तेयां नियमितेयांतु यमु । जो कर्मसाक्षि धर्मु ।
 तो मीं ह्मणे रामु । अर्जुनातें ॥ २६ ॥

प्रन्हादश्चास्मि दैत्यानां कालः कलयतामहम् ।
 मृगाणां च मृगेंद्रोऽहं चैनतेयश्च पक्षिणाम् ॥ ३० ॥
 आगा दैत्यांचां कुली । प्रह्लादु तो मी निहाली ।
 ह्मणौनि द्वेष्यभावादिमली । लीपे चि ना ॥ २७ ॥
 पै कलितेयां माझि महाकालु । तो मीं ह्मणे गोपालु ।
 स्वापदां आंतु शार्दूलु । तो माझें चि रूप ॥ २८ ॥
 आगा पक्षजातीं माझारि । गरुडु तो मीं अवधारि ।
 ह्मणौनि निभियाचिये पाठीवरी । वाहवें मीं ॥ २९ ॥

पवनः पवतामस्मि रामः शस्त्रभृतामहम् ।
 श्मशानां मकरश्चास्मि स्रोतसामास्मि जान्हवी ॥ ३१ ॥
 पृथ्वीचेया पैसारा । माझि टाकितेया धर्नुदरा ।
 येकें चि उडाणें स्वर्गांतरा । करिति जें कां ॥ २३० ॥
 तेयां बहिलेयां आणि गतिमंतां ।
 आंतु पवनु तो मीं पांडुसुता ।
 शस्त्रधरां समस्तां ।
 माझि रामु तो मी ॥ ३१ ॥
 सांकडलेया धर्माचेनि कैवारें । आपणपेयां धनुष करुनि दुसरें ।
 विजयलक्ष्मी एक मोहरें । केलें त्रेती ॥ ३२ ॥
 पृष्टि उभें ठाकौनि सुवेलीं । प्रतापें लंकेधराचां सिसालीं ।
 गगनीं उदो ह्मणतयां बलि । दीधली भूतां ॥ ३३ ॥

जेणें देवांचा मानु साधिला । धर्मासि जीर्णोद्धार केला ।
 सूर्यवंशीं उदैला । सूर्यो जो कां ॥ ३४ ॥
 तो हातियेरप्रजितेयां आंतु । रामचंद्र जानकीयेचा कांतु ।
 आणि मकर मीं + त्रिवंतु । जलचरां माझि ॥ ३५ ॥
 पै समस्तां वोघां । आंतु भागीरथी गंगा ।
 ते जेव्हां गीलिली मग जांघा । फाडूनि दीन्हली ॥ ३६ ॥
 जे त्रिभुवनैकसरिता । जान्हवी मीं पांडुसुता ।
 जलप्रवाहां समस्तां । माझि जाण ॥ ३७ ॥

सर्गाणामादिरंतश्च मध्यं चैवाहमर्जुन ।

अध्यात्मविद्या विद्यानां वादः प्रवृत्तामहम् ॥ ३८ ॥

ऐसां वेगलालां सृष्टि पैकिं । विभूति नाम स्तुतिं एकैकिं ।
 सगलेनि जन्मसहस्रीं अवलोकीं । परि आर्धिया न्हवति गा ॥ ३८ ॥
 आगा आघवीं चि नक्षत्रें वेंचारीं ।
 ऐसी चाड उपजे जीवीं ।
 तैं गगनाची बांधावी ।
 लोथ जेवि ॥ ३९ ॥
 कां पृथ्वीचेयां परमाणू उगाणा घेयावा । भूगोलु काखे सुआवा ।
 तैसा हा विस्तार माझा । तरि जाणावें मार्तें ॥ ४० ॥
 जैं शाखा फूल फल । घेऊं पाहिजे सकल ।
 तैं उपडूनु मूल । हातिं घेपे ॥ ४१ ॥
 तेवि माझे विभूतिविशेष । जाणों पाइजेति अशेष ।
 तरि स्वरूप हें निर्दोष । जाणावें माझें ॥ ४२ ॥
 यन्हवि वेगलालां विभूतीं । काइएक परियससी केती ।
 क्षणौनि एकीहेला महामती । सर्व मीं जाण ॥ ४३ ॥
 मी आघविचा सृष्टी । आदिमध्यअंतीं किरीटी ।
 अस्तमोत पटी । तंतु जैसा ॥ ४४ ॥

ऐसेया व्यापका मातें जाणावें । तरि विभूतिभेदीं काइ करावें ।
 पारि हें तुज योग्य न्हवे । हणौनि असो ॥ ४५ ॥
 कां जें तूं माझेया विभूती । हणौनि तिया आइकें सुभद्रापती ।
 तरि विद्यां माझि प्रस्तुतीं । अध्यात्मविद्या मीं ॥ ४६ ॥
 आगा बोलतेयाचां ठांड । वादु तो मी पाहीं ।
 सकलें शास्त्रसमेत काहीं । संरेचिना ॥ ४७ ॥
 जो निर्वचु करितां वाढे । आइकिल्यां उत्प्रेक्षे सळ चढे ।
 जेयावारि बोलतेयांचीं गोडें । बोलणीं होति ॥ ४८ ॥
 तैसें पां प्रतिपादितेयां माझि वादु । तो मीं हणें मुकुंदु ।
 अक्षरां माझि विशदु । अकार तो मीं ॥ ४९ ॥

अक्षराणामकारोऽस्मि द्वंद्वः सामासिकस्य च ।

अहमेवाक्षयः कालो धाताहं विश्वतोमुखः ॥ ३३ ॥

समासा माझारि । द्वंदु तो मीं अवधारीं ।
 जां मशका लागौनि ब्रह्मावेन्हीं । प्रासी तो मीं ॥ २५० ॥
 जां प्रलयतेजा देतां मीठी । सगलेया पवनातें गीलीं किरीटी ।
 आकाश जेयाचां पांटीं । सामावळें ॥ ५१ ॥
 एसा अपारु जो कां कालु । ती मी हणें लक्ष्मीलालु ।
 एया वारि सृष्टिचा मेलु । सजीं तो मीं ॥ ५२ ॥

मृत्युः सर्वहरश्चाहमुद्भवश्च भाविष्यताम् ।

कीर्तिः श्रीर्वाक्च नारीणां स्मृतिर्मेधा धृति क्षमा ॥ ३४ ॥

आणि सृजिलेयां भूतातें मीं चि धरीं ।
 सकलां ही जीवन मी चि अवधारीं ।
 शेषिं सकलातें संहारीं ।
 तेव्हळि मृत्यु ही मीं चि ॥ ६३ ॥
 आतां स्त्रीगणाचां पैकीं । माझिया विभूति सात येकी ।
 तेती आइक कवतिकीं । सांधिजति ॥ ५४ ॥

तरि सदा नवी जे कीर्त्ति । ते अर्जुना माझी मूर्ति ।
 आणि औदार्याची संपत्ति । ते ही मी चि जाण ॥ ५५ ॥
 पै स्थैर्यताअनुजिनी । मेघा ते मीं ये जनीं ।
 धृति मी त्रिभुवनीं । क्षमा ते मीं ॥ ५६ ॥
 एवं नारी माझारि । इया सात शक्ती मीं अवधारीं ।
 ऐसें संसारगजकंसरी । हणता जाळा ॥ ५७ ॥

बृहत्साम तथा साक्षां गायत्री छंदसामहम् ।

मासानां मागशीर्षोहमृतूनां कुसुमाकरः ॥ ३५ ॥

वेदराशिचेया सामां । आंतु बृहत्साम प्रियोत्तमा ।
 तो मीं हणें रमा— । प्राणेश्वर ॥ ५८ ॥
 आया गायत्रीछंद जें ह्यणिजे । सकल छंदांमाझि जें ।
 तें स्वरूप माझें । जाण निभ्रांत ॥ ५९ ॥
 मासां आंतु मार्गशिर । तां मीं हणें सारंगधर ।
 रतू आंतु कुसुमाकर । वसंतु तो मीं ॥ २६० ॥

धृतं छलयतामस्मि तेजतेजस्विनामहम् ।

जयोऽस्मि व्यवसायोऽस्मि सर्वं सत्त्ववतामहम् ॥ ३६ ॥

यां खेलतेयां विंदाणां । माझि धृत मीं विचक्षणा ।
 ह्यर्णानि चोहटां चोवारा कवृणां । वारुं नये ॥ ६१ ॥
 आगा सकलां हिं तेजसां । माझि तेज तें मीं भवसा ।
 मीं कार्य उद्देशां । सकलां माझि ॥ ६२ ॥
 जेणें चांखालुती सन्या३० । तो व्यवसाया आंतु व्यवसा३० ।
 माझें रूप हें हणें रा३० । सुरवरांचा ॥ ६३ ॥
 सत्वाधिलेयां आंतु । सत्व तें मीं हणें अनंतु ।
 यां यादवां आंतु श्रीमंतु । तो मीं जाण पै ॥ ६४ ॥

वृष्णीनां वासुदेवोऽस्मि पांडवानां धनंजयः ।

मुनीनामप्यहं व्यासः कवीनामुदाना कविः ॥ ३७ ॥

जो देवकिये वसुदवातव जाला । कुमारीसाठि गोकुला नेला ।
 प्राणु सकटुनि आटिला । पूतनेचा ॥ ६५ ॥
 नुमटतां बालपणाची फूली । जेणें मियां अदानवी सृष्टि केली ।
 करिं गिरिवरु धरुनि उमाणिली । महेंद्रमहिमा ॥ ६६ ॥
 कालिदियेचें हृदयशल्यु फेडिलें ।
 जेणें मियां जलतें गोकुल राखिलें ।
 वांसुरुवां साठिं लाविलें ।
 विरिंची पिसें ॥ ६७ ॥
 प्रथमदशेचिये अटाट । माझि कंसा पेंसी अचाटें ।
 महा ठेंढीं अवचटें । लीला चि नाशिलीं ॥ ६८ ॥
 हें काइ एक केती सांघावें । तुवां हि देखिलें आइकिलें आघवें ।
 तरि यादवां माझि जाणावें । हें चि रूप माझें ॥ ६९ ॥
 आणि सोमवंसिचेयां पांडवां । माझि अर्जुनु तो मीं जाणावा ।
 ह्मणौनि यकमेकाचेयां प्रेमभावां । सल चडतसे ॥ ७० ॥
 मुनी आंतु व्यासु देऊ । तो ह्मणे मीं यादवराऊ ।
 कविं आंतु धैर्यां ठाऊ । उशना कवि तो मीं ॥ ७१ ॥

बंडो दमयतामस्मि नीतिरस्मि जिगीषताम् ।

मौनं चैवास्मि गुह्यानां ज्ञानं ज्ञानवतामहम् ॥ ३८ ॥

आगा नियमितेयां माझारि । दंडु मीं अवधारिं ।
 जो मुंगिये लागौनि ब्रह्मावेन्हीं । नीयमीनु असे ॥ ७२ ॥
 पै सारासार निर्द्धारितेयां । धर्मज्ञतेचा पक्षु धरीतेयां ।
 सकलां शास्त्रां माझि येयां । नीतिशास्त्र ते मीं ॥ ७३ ॥
 आघवेयां गूढां । माझि मौन मीं सुहाडा ।
 ह्मणौनि बोलतेया पुढां । स्वष्टा ही नेणु होये ॥ ७४ ॥
 आगा ज्ञानियांचां ठांड । ज्ञान ते मीं पाहीं ।
 आतां असो हें काहीं । पार नेदखों ॥ ७५ ॥

यथापि सर्वभूतानां बीजं तदहमर्जुन ।

न तदस्ति विना यत्स्यान्मया भूतं चराचरम् ॥ ३९ ॥

पाहिं पर्जन्याचिया धारां । लेख होईल धनुर्दरा ।

कां पृथ्वीचेया तृणांकुरां । होईल ठी ॥ ७६ ॥

नां तारि महोदधिचेयां तरंगां । व्यवस्था जेविकरुं नैये पै गा ।

तेवि माझेयां वेखां गा । लेख नाहिं ॥ ७७ ॥

ऐसिया पांचसात प्रधाना । विभूती सांगितलिया अर्जुना ।

तो उद्देशु गा मना । आहाचु गमला ॥ ७८ ॥

नांतोऽस्ति प्रम दिव्यानां विभूतीनां परंतप ।

एष तूद्देशतः प्रोक्तो विभूतेर्विस्तरो मया ॥ ४० ॥

एन्हविं विभूति-विस्ताग काहिं । एथ सर्वथा लेख नाहिं ।

हणौनि तूं परियससी काई । आह्मीं सांघों केती ॥ ७९ ॥

एया लागि येकी हेली तुज । दाऊं आतां वर्म निज ।

तारि सर्व भूतांकुरें बीज । विरूढतसे तें मीं ॥ ८० ॥

हणौनि सानें थोर न हणारें । उंच नीच भार सांडावे ।

एकु मी चि ऐसें जाणारें । वस्तुजात तें ॥ ८१ ॥

यद्यद्विभूतिमत्सत्त्वं श्रीमदूर्जितमेव वा ।

तत्तदेवावगच्छ त्वं मम तेजोऽशसंभवम् ॥ ४१ ॥

आतां एया ही वारि साधारण ।

आइक पां आणिकि ही एक खूण ।

तारि अर्जुना तें जाण ।

विभूति माझी ॥ ८२ ॥

जेथ संपत्ति आणि दया । दोन्ही आलिं असति एका चि ठाया ।

ते ते जाण धनंजया । अंश माझे ॥ ८३ ॥

अथवा एकलें विंन गगनीं । परि प्रभा फांके जेवि त्रिभुवनीं ।

तैसि मज येकाची सकल जनीं । आज्ञा पालिजे ॥ ८४ ॥

तयातें एकलें हें झणें लणा । तो निर्झनु या भाषा नेणा ।
 काइ कामधेनु सवें उगाणा । चालतसे ॥ ८५ ॥
 तियेतें जेधवां जें जो मागे । तें ते एकसरें प्रसवों लागे ।
 तेवि विभव तेया आंगें । होउनि आलें ॥ ८६ ॥
 तेयातें ओलवावेयाची संज्ञा । जे नमस्कारिजेति आज्ञा ।
 ऐसे ते आहाति प्राज्ञा । अवतार आमचे ॥ ८७ ॥
 आणि एक सामान्य विशेष । हें जें जाणणें सदोष ।
 जें मीं चिं येकु अशेष । विश्व हें लक्षणानि ॥ ८८ ॥
 तारि आतां साधारणु आणि चांगु ।
 ऐसा कैसा कल्पावा पां विभागु ।
 वायां चि आपुलिये दीठी वंगु ।
 भेदाचा लावावा ॥ ८९ ॥
 एन्हविं तन्हीं तूप काइयेया गुसलावें ।
 अमृत कां गालुनु आर्धें करावें ।
 हां गा पाउसीं काइ डावे ।
 जेवणें आंग होये ॥ ९० ॥
 पैं सूर्यविन्नासि पोटपाटि । देखतां नाशे आपुली दृष्टि ।
 तेवि माझां स्वरूपिं गोठि । सामान्यविशेष चि ॥ ९१ ॥

अथवा बहुनैतेन किं ज्ञातेन तवार्जुन ।

विष्टभ्याहमिदं कृत्स्नमेकांशेन स्थितो जगत् ॥ ४२ ॥

आणि सिनानां विभूतीं । मज अपारातें मविसी केती ।
 लणौनि सुभद्रापती । असो हें जाणणें ॥ ९२ ॥
 आतां पैं माझेनि येकें अंशें । जें हें जग चि व्यापलें असे ।
 एया लागि भेटु सांडी सरिसें । साम्यें भज ॥ ९३ ॥
 ऐसें बुधवनवसतें । तेणें विरक्ताचिन कातें ।
 बोलिलें श्रीमंतें । कृष्णदेवें ॥ ९४ ॥

तेथ अर्जुनु हणें स्वामीं । येतुलें रहस्यें बोलिलें तुझीं ।
 जें भेदु येकु आणिकु आहि । सांडावा तरि ॥ ९५ ॥
 आहो सूर्य हणें जगातें । हें आंधारें दवडा कां परौतें ।
 तेवि धसालु हणें देवातें । तरि अधिकु जी बोलु ॥ ९६ ॥
 तूझें नाम चि कोणही वेले । जेयांचेया मुखाकानासि मिले ।
 तेयांचेया हृदयातें सांडुनि पवले । भेदु जी हा ॥ ९७ ॥
 चंद्रबिंबाचां गाभारां । रिगालेयां जरि उबारा ।
 तैसें राभस्यें सारंगधरा । बोला तुझीं ॥ ९८ ॥
 तेथ सवियां चि परि तोखौनि देवें ।
 अर्जुनातें आलिंगिलें जीवें ।
 मग हणें तुवां न कोपावें ।
 आमचेया बोला ॥ ९९ ॥
 आह्मीं तुज भेदाचिया वाहाणीं ।
 सांघीतली जे विभूतीची काहाणी ।
 ते अभेदे अंतष्करणीं ।
 मानली कीं न मने ॥ ३०० ॥
 हें चि पाहावेया लागि । बोलिलों बाहिर सवडिया भंगीं ।
 तव विभूति तुज चांगी । आली बोधा ॥ १ ॥
 तेथ अर्जुनु हणें देवें । हें आपुलें आपण जाणावें ।
 परि देखतसे आघवें । तुवां आरंभलें ॥ २ ॥
 पै राया तो पांडुमुतु । ऐसिये प्रतीतीचा जाला वरैतु ।
 एया संजयाचेया बोला निवातु । श्रृतराष्ट्र राहे ॥ ३ ॥
 किं संजयो दुखवलेनि अंतष्करणें । हणें नवल नाहें देव दवडणें ।
 हा आंतु मीं धडसा हणें । तव आंतु ही आंधला ॥ ४ ॥
 परि हें असो आतां तो अर्जुनु । अद्वैताचा वाढवीतसे मानु ।
 किं तेया वरि आनु । विवंमा मांडला ॥ ५ ॥

ह्मणे हे चि हृदया आंतुली प्रतीती ।
 बाहिरि अवतरो कां डोलेया प्रति ।
 यया चित्ताचां पाउलीं मती ।
 उठिती जाली ॥ ६ ॥
 मियां इहीं चि दोहीं डोलां । झोंवावें विश्वरूपा सकला ।
 येवढी हावें देवांगला । ह्मणौनि करी ॥ ७ ॥
 आजि तो कल्पतरूची शाखा । ह्मणौनि वांझौलें न लागति देखां ।
 जें जें येईल तेयाचेया मुखा । तें साच करितसे एरु ॥ ८ ॥
 जो प्रन्हादाचेया बांला । विषयो ही सकल आपण जाला ।
 तो सद्गुरु असे जोडला । किरीटी तेया ॥ ९ ॥
 ह्मणौनि विश्वरूप पूसावेया लागि ।
 पार्थु रिगता होईल कवणी भंगीं ।
 तें सांधिजैल पुढिलिये कथाप्रसंगीं ।
 ह्मणे ज्ञानदेउ निवृत्तिचा दामु ॥ ३१० ॥

ॐ ॥ तत्सदिति श्रीमद्भगवद्गीतासूपनिषत्सु ब्रह्मविद्यायां

योगशास्त्रे श्रीकृष्णार्जुनसंवादे विभूतियोगो

नाम दशमोऽध्यायः ॥

॥ श्रीकृष्णार्पणमस्तु ॥



ज्ञानेश्वरी

अध्याय अकरावा

भोगणेशायनमः ॥

आतां एयावारि एकादशीं । कथा आहे दोहों रसिं ।
जेथ पार्था विश्वरूपेंसीं । भेटि होइल ॥ १ ॥
जेथ शांताचेया घरा । अद्भुत आला आहे पाहुणारा ।
आणि येरां हिं रसां पांतिकरां । जाला मानु ॥ २ ॥
बधुवरांचिये मीलणीं । जैसिं वन्हडियां हिं लुगडीं लेणीं ।
तैसे देशिचिये सुखासनीं । मिरवले रस ॥ ३ ॥
पारि शांताद्भुत बरवें । जेथ डोलेयांचा अंजुलिं घेयावें ।
जैसे हरिहर प्रेमभावे । आले खेवां ॥ ४ ॥
मातारि अवसेचां दिसीं । भेटलीं दोन्हीं बिबें जैसीं ।
तेथि येकवला रसीं । केला जेथ ॥ ५ ॥
मीमले गंगेयमुनेचे उग्ध । तैसें यां रसांचें जालें प्रयाग ।
हणौनि सुस्नात होत जग । आघवें एथ ॥ ६ ॥
मथ्यें गीतासरस्वती गुपित । आणि दोन्ही रस बांध मूर्त ।
या लागि त्रिवेणी होये उचित । फावली बापा ॥ ७ ॥
एथ श्रवणाचेनि द्वारे । तीर्थ रिगतां सोपारें ।
ज्ञानदेव जणे दातारें । माझेनि केलें ॥ ८ ॥

तीरें संस्कृताचीं गहनें । तोडूनि मन्हाटिया केलीं शब्दसोपानें ।
 रचिलीं धर्मनिधानें । निवृत्तिदेवें ॥ ९ ॥
 ह्यर्णानि भलेंतेणें एथ न्हावें । प्रयागीं माधवीं विश्वरूपातें पाहावें ।
 एतुलेनि संसारा देयावें । तिलोदक ॥ १० ॥
 हें असो ऐसें सावेव । जेथ सांसिनले आथि रसभाव ।
 जेथ श्रवणमुखाची राणिव । जोडली जगा ॥ ११ ॥
 जेथ शांताद्भुत रोकडे । आणि एरां रसां पडप जोडे ।
 हें अल्प चि परि उघडें । कैवल्य जेथ ॥ १२ ॥
 तो हा अकरावां अध्या३० । देवांचें आपणपें ठेविता ठा३० ।
 परि कैसा सदैवांचा रा३० । जें एथ हि पातला ॥ १३ ॥
 आदिं अर्जुनु चि काइ ह्यर्णों पातला ।
 आजि हा आवडतेया हि सुकालु जाला ।
 जें गीतार्थु हा आला ।
 मन्हाटिया ॥ १४ ॥
 एथा चि लागि आतां माझे । विनविलें तें आइकिजे ।
 तरि अवधान आतां दीजे । सज्जनीं तुह्मीं ॥ १५ ॥
 आहो तेविं चि तुह्मां संतांचिये सभे ।
 ऐसी सलगि करुं न लभें ।
 परि मानावें जी लोभें ।
 अपत्या मातें ॥ १६ ॥
 आहां पुंसा आपण चि पढविजं ।
 मग बोलें तथं तथं माथा तूकिजे ।
 कां करविलेनि चोर्जे न रिझे ।
 बालका माए ॥ १७ ॥
 तेवि मी जें जें बोलें । तें प्रभू तुमचें चि केलें ।
 ह्यर्णानि अवधारिजो आपुलें । आपण देवा ॥ १८ ॥

हैं सारस्वताचें गोड । तुझीं चि लाविलें जी झाड ।
 तारि अवधानामृतें वाड । सिंपौनि कीजो ॥ १९ ॥
 मग हें रसभावफुलीं फुलैल । नाना फलभारें भरैल ।
 तुमचेनि प्रसादें होइल । उपयोगु जगा ॥ २० ॥
 येया बोला संत रिझले । ह्मणति तोखलों गा भलें केलें ।
 आतां साधें जें बोलिलें । अर्जुनें तेथ ॥ २१ ॥
 तव निवृत्तिदासु ह्मणे । कृष्णा अर्जुनाचें बोलणें ।
 मीं प्राकृतु काइ सांघों जाणें । परि बोलवाल तुझीं ॥ २२ ॥
 आहो रानिचेयां पालेखाइरां । नेवाणें करविलें लंकेश्वरा ।
 एकला अर्जुनु परि अकरा । न जीणे क्षौणी ॥ २३ ॥
 ह्मणौनि समर्थ होये साहाकारी । मान्हेवे कैसें सचराचारीं ।
 तुझीं संत तियापरीं । बोलवां मातें ॥ २४ ॥
 तारि आतां बोलतसें आइकां । हा गीताअभिप्रा० नीका ।
 जो वैकुण्ठनायका । मुखौनि निगाला ॥ २५ ॥
 बापु ग्रंथु गीता । जो वेदीं प्रतिपाद्य देवता ।
 तो श्रीकृष्णु वक्ता । जिये ग्रंथीं ॥ २६ ॥
 तेथिचें गौरव कैसें वानावें । जें शंभूचिये मतीसि नांगवें ।
 तें आतां नमस्कारिजे जीवें । हें चि भलें ॥ २७ ॥

अर्जुन उवाच ।

मदनुग्रहाय परमं गुह्यमध्यात्मसंज्ञितम् ।
 यस्त्वयोक्तं वचस्तेन मोहोऽयं विगतो मम ॥ १ ॥
 मग आइकां तो किरीटी । घाल्नि विश्वरूपीं दीठि ।
 पहिली कैसी गोठि । करिता जाला ॥ २८ ॥
 हें सर्व ही सर्वेश्वर । ऐसा प्रतीतिगतु जो पतिकर ।
 तो ब्रह्महिर होआवा गोचर । लोचनांसि ॥ २९ ॥
 ३८

हे जीवाआंतुली चाड । परि देवा सांगतां सांकड ।
 जें विश्वरूप गूढ । कैसनि पूसावें ॥ ३० ॥
 झणे मागां कव्हणें काहीं । जें पढियंतेन पूसिलें नाहिं ।
 तें सहसा कैसें पाहिं । सांघा झणों ॥ ३१ ॥
 मीं जन्हीं सलगीचा चांगु । तन्हीं काइ आयिसांठूनि अंतरंगु ।
 परि तियें हीं हा प्रसंगु । पूसों भियालीं ॥ ३२ ॥
 मजसिं जेहे कारिति बोली । परि नाहिं गरुडाचेया येतुली ।
 तो ही सकट हे बोली । करुं न शके ॥ ३३ ॥
 मी काये सनकादिकांठूनि आगला ।
 पारि ते ही न करिती चि हा चाला ।
 आणि आवडैन काइ प्रेमला ।
 गोकुलिचेयांठूनि ॥ ३४ ॥
 तेयातें लेंकुरपणें झांकविलें । एकांचे गर्भवास साहिले ।
 परि विश्वरूप हें राहविजें । दावि चि ना ॥ ३५ ॥
 हा ठावावेन्हीं गुज । याचिये अंतरिचें निज ।
 केवि उराउरी मज । पूसों येईल ॥ ३६ ॥
 आणि न पुसों जरि झणें । तरि सुख न्हवेल अंतःकरणें ।
 मग काइ करावें जीणें । जीउनि आहीं ॥ ३७ ॥
 झणौनि पूसों आतां अलुमालु ऐसें । मग करुं देवां ठाके तैसें ।
 एणें प्रवृत्तला साध्वसें । पार्थु बोलों ॥ ३८ ॥
 परि तें चि ऐसेनि भावें । जें येकां दो उत्तरांसवें ।
 दावी विश्वरूप आघवें । झाडा देउनि ॥ ३९ ॥
 जैसें बांसरुं देखिलेयां दीठी । धेनु खडपडौनि मोहें उठी ।
 मग स्तनामुखाचिये भेटी । काइ पान्हा धरे ॥ ४० ॥
 तैसा पण्डवाचेनि नावें । जो कृष्णु रानी येका धावें ।
 तेयातें जब अर्जुन पुसावें । तब साहील काई ॥ ४१ ॥

तो साहाजें झेहाचें अवतरण । आणियेरु झेहा धातलें माजवण ।
 एसिये मिलणी वेगलेपण । उरे हें चि बहु ॥ ४२ ॥
 झणौनि अर्जुनाचेया बोला सारिसा ।
 देउ० विश्वरूप होईल आपैसा ।
 तो चि पहिला प्रसंगु कैसा ।
 आइकिजो तरि ॥ ४३ ॥
 मग पार्थु देवातें झणे । जें तुझीं मजकारणें ।
 बाच्य केलें बोलणें । कृपानिधी ॥ ४४ ॥
 जें महाभूतें ब्रह्मीं आटति । जीव महदादिचे ठाये फीटति ।
 तें देउ० होउनि जें ठांति । तें विसवणें शेषिचें ॥ ४५ ॥
 होंतें हृदयाचां परीवरीं । रोविलें कृपणाचिया परीं ।
 शब्दब्रह्मासीं चोरी । जेयाची केली ॥ ४६ ॥
 तें तुझीं जी आपुलें । मज पुढां हियें फोडिलें ।
 जें अध्यात्म वोत्रालिलें । ऐश्वर्य हरें ॥ ४७ ॥
 ते वस्तु मज स्वामी । एकीहेला दीधली तुझीं ।
 हें बोळें झणतां तरि आझीं । तूं पाहूनि कैचें ॥ ४८ ॥
 परि साच चि मोहाचां महापुरीं । बुडालेयां देखौनि सीसबेन्हीं ।
 तूं आपणपें घातलें हरी । मग काढिलें मातें ॥ ४९ ॥
 एकु तूवांचूनि काहिं । विश्वि दूजेयाची भाष नाहिं ।
 किं आमचें कर्म पाहीं । जें आझिं आथि झणों ॥ ५० ॥
 मीं जगीं येकु अर्जुनु । ऐसा देहिं बांधें अभिमानु ।
 आणि कौरवांतें यां स्वजनु । आपुला झणें ॥ ५१ ॥
 या ही वरि यांतें मीं मारीन । तेणें पापें कांइ करीन ।
 ऐसें देखतु होंतां दुस्वप्न । तो चेवत्रिलां तुझीं ॥ ५२ ॥
 देवा गंधर्वनगरां वसती । टाकुनु गेलेयां लक्ष्मीपती ।
 होंतां उदकाचिया आर्त्ती । रोहिणी पीतु ॥ ५३ ॥

जी कीडरं तरि कापडाचें । परि लाहरी येंत होती सार्थें ।
 ऐसेनि वायां मरतेया जीविताचें । श्रेय तुवां घेतलें ॥ ५४ ॥
 आपुलें बिंब नेदखतां । सिंहु कुहां घालील देखों आतां ।
 ऐसा धरिजे तेवि अनंता । राखिलें मार्तें ॥ ५५ ॥
 यन्हविं तरि माझा एतुले वेन्हीं । येथ निश्चयो होता अवधारीं ।
 जें आतां चि सार्तें सागरीं । एकवाट मिलिजो ॥ ५६ ॥
 हें युग चि आघवें बुडावें । वरि आकाश ही तूटौनि पडावें ।
 परि जूझणें मज नोहावें । गोत्रेंसि पै ॥ ५७ ॥
 ऐसिया अहंकाराचिया वाढी । मियां आप्रहजलिं दिघली बुडी ।
 चांग चि जवला तूं यन्हविं काढी । कोण मार्तें ॥ ५८ ॥
 नाथिलें आपणपें येक मानिलें ।
 आणि न्हवतेया नावं गोत्र ठेविलें ।
 थोर पिसें होतें लागलें ।
 परि राक्षिलां तुझीं ॥ ५९ ॥
 मागां जलत काढिलों जौहरीं ।
 तैं तें देहासी चि भय अवधारीं ।
 आतां हे जौहरवाहर दुसरी ।
 चैतन्या सकट ॥ ६० ॥
 दुराग्रहें हिरण्याक्षें । माझि बुद्धि सूदली कक्षें ।
 मग मोहार्णवगवाक्षें । रिगौनि ठेला ॥ ६१ ॥
 एथ तूझेनि गोसांविपणें । येकोल बुद्धीचेया ठाया येणें ।
 हें दुसरें वराहो होणें । पडिलें तुज ॥ ६२ ॥
 ऐसें ऐसें अपार तूजें केलें । एकी वाचा मीं काड बोलें ।
 परि जें पांचै पालव मोकलिले । मजप्रति ॥ ६३ ॥
 तें काहीं न वचे चि वायां । भलें यश फावळें देवरायां ।
 जें साद्यंतां माया । निरसिली आजी ॥ ६४ ॥

जी आनंदसरोवरिचीं कमलें । तैसे हे तूझे डोले ।
 आपुलेया प्रसादाचीं राउलें । जेया लागि करिति ॥ ६५ ॥
 हां हो तेया ही आणि मोहाची भेटी ।
 हे काइसी जी पावली गोठी ।
 केउति मृगजलें वृष्टि ।
 वडवानलेंसी ॥ ६६ ॥
 आणि मी तवं दातारा । इये कृपेचां रिघौनि गाभारां ।
 घेतसें चारा । ब्रह्मरसाचा ॥ ६७ ॥
 तेणें माझा जी मोहो जाए । एथ विस्मो काइ आहे ।
 परि उद्धरलां तूझे पाए । सितले आथि ॥ ६८ ॥

भवाप्ययौ हि भूतानां श्रुतौ विस्तरशो मया ।

त्वत्तः कमलपत्राक्ष माहात्म्यपि चाव्ययम् ॥ २ ॥

पैं कमलायतन डोलसा । सूर्यकोटितेजसा ।
 मियां तुज पासौनि महेशा । परिसिलें आजि ॥ ६९ ॥
 इयें भूतें जेया परीं होंति । अथवा लया हान जांति ।
 ते मज पुढें प्रकृति । विवंचिली देवें ॥ ७० ॥
 आणि प्रकृती कीर उगाणा दीन्हला ।
 परि पुरुषाचा ही ठाऊ फेडिला ।
 जेयाचा महिमा पांगुरौनि जाळा ।
 धडौता वेदु ॥ ७१ ॥
 कां शब्दराशि वाढे जिये । कां धर्मी ऐसेयां रत्नातें विये ।
 तें तेथिचिये प्रभेचे पाए । उलगे ह्मणौनि ॥ ७२ ॥
 ऐसें अगाध माहात्म । जें सकल मार्गा एकगम्य ।
 जें स्वयं आत्मानुभवम्य । तें इयापरीं दाविलें ॥ ७३ ॥
 जैसा केरु फीटलेयां अभालीं । दीठि रिगे सूर्यमंडलीं ।
 कां हातें साकनि बाबुली । जल देखिजे ॥ ७४ ॥

नां तरि उकलतेयां सापांचा वेढे । जैसे चंदना खेवं देणें घडे ।
 अथवा विवसी पले मग चडे । निधान हाता ॥ ७५ ॥
 तैसी प्रकृति हे आड होंती । ते देवें चि सारुनि केली परौती ।
 मग परतत्व माक्षिये मती । सेजार केलें ॥ ७६ ॥
 ह्मणौनि इयें विखिंचा मज देवा । प्रत्यो घडला माझेया जीवा ।
 परि आणिकु येकु हेवा । उपजतु असे ॥ ७७ ॥
 तो भिडा जरि ह्मणों राहों । तरि आणिक कवणा सांघों जाऊं ।
 काह् तुज वांचूनि ठाऊं । आणिकु असे ॥ ७८ ॥
 जलचर जलाचा आभारु धरी ।
 बालक स्तनपानीं उपरोधी करी ।
 तरि तेयासि जियावेया हरी ।
 उपाऊं आणिकु असे ॥ ७९ ॥
 ह्मणौनि भिड सांकडि न धरवे । आवडे ते तुज पुढां बोलावें ।
 तव राहे ह्मणितलें देवें । चाड सांघें ॥ ८० ॥

पद्ममेतद्यथा त्वमात्मानं परमेश्वर ।

द्रष्टुमिच्छामि ते रूपमेश्वरं पुरुषोत्तम ॥ ३ ॥

मग बोलिला तो किरीटी । ह्मणे तुहीं जे केली गोठि ।
 तिये प्रतीति दिठी । निवाली माझी ॥ ८१ ॥
 आतां जेयाचेनि संकल्पें । हे लोकपरंपरा आरोपे ।
 जेया ठायतें आपणपें । मीं गा ह्मणसी ॥ ८२ ॥
 जें मूलस्वरूप तूझें । जेथौनि इयें द्विभुजें चतुर्भुजें ।
 सोआंगें सुरकार्याचेनि व्याजें । घेऊं घेऊं येसि ॥ ८३ ॥
 जलसेनाचिया गवसण्यां । मळ कूर्मु इया मिरवण्यां ।
 खेळु सरलेयां तुं गुण्यां । सांठविसि जेथें ॥ ८४ ॥
 उपनिषदें जें गाति । योगिये इदइं रिगौनि पांति ।
 जेयातें सनकादिक आहाति । पोटळनियां ॥ ८५ ॥

ऐसें अगाध जें तूझें । विश्वरूप कार्नीं आइकिजे ।
 तें देखावया चित्त माझें । उताविल देवा ॥ ८६ ॥
 देवें फेडूनियां सांकड । लोभें पूसिली जरि चाड ।
 तरि हें चि एक वाड । आर्त्त जी मज ॥ ८७ ॥
 तूझें विश्वरूप आघवें । माक्षियें दीठीसि गोचर होआवें ।
 ऐसी धोर आश जीवें । घेतली असे ॥ ८८ ॥

मन्यसे यदि तच्छुक्थं मया द्रष्टुमिति प्रभो ।
 योगेश्वर ततो मे त्वं दर्शयात्मानमव्ययम् ॥ ४ ॥

पण एथ आणिक एक शारंगी ।
 तुज विश्वरूपातें देखावेया लागि ।
 योग्यता माझां आंगीं ।
 असे किं नाहिं ॥ ८९ ॥
 हें आपुलें आपण मीं नेणें । तें कां नेणासि जरि देऊ हणें ।
 तरि सरोगु काइ जाणे । निदान रोगाचें ॥ ९० ॥
 आणि आर्त्तिचेंनि पडिभरें । आर्त्तु आपुली टाकि पां विसरे ।
 जैसा तान्हेला हणें न पुरे । समुद्र हा मज ॥ ९१ ॥
 ऐसी सचाडपणाचिया भूली ।
 न संभाली सवियां समस्या आपुली ।
 यया लागि योग्यता माउली ।
 बालाची जाणे ॥ ९२ ॥
 तेया पारि जनार्दना । विचारिजो माझी संभावना ।
 मग विश्वरूपदर्शना । उपक्रमु किजो ॥ ९३ ॥
 तरि तैसी ते कृपा करा । एन्हविं न्हवे हणां अवधारां ।
 बायां चि पंचमालापें बधिरा । मुख केउतें देणें ॥ ९४ ॥

एन्हविं एकलेया बापैयाचिये तूषे ।
 मेघु जगा पुरतें काइ न वरिखे ।
 परि ते ही वृष्टि उपखे ।
 जरि खडकां वारि होए ॥ ९५ ॥
 चकोरां चंद्रामृत फावलें । एरां अणवाउनि काइ वारिलें ।
 पारि डोलां विण पाहालें । बायां चि जाए ॥ ९६ ॥
 हणौनु विश्वरूप तूं सहसा । दाविसी किरु भरवसा ।
 जें कां कडाडां आणि गहिंसासा । नीच नवा तूं किं ॥ ९७ ॥
 तूझे औदार्य जाणों स्वतंत्र । देतां न हणसि पात्रापात्र ।
 न्हवे कैवल्य ऐसें पवित्र । वैरियां दीन्हलें ॥ ९८ ॥
 मोक्षु दुराराध्यु किरु होये । परि तो ही आराधी तूझे पाये ।
 हणौनि धाडिसी तेथ जाये । पाइकु जैसा ॥ ९९ ॥
 तुवां सनकादिकांचेनि मानें । सायुजीं सौरसु केला प्रतने ।
 जें विषाचेनि स्तनपानें । रुसली तुज ॥ १०० ॥
 हां गा राजसूयाचां सभासदीं । देखतां त्रिभुवनिची मांदी ।
 कैसा शतधा दुर्वादीं । निस्तेजिलासि ॥ १ ॥
 किं तुवां तेया शिशुपाला । आपणपां ठाऊ दीधला गोपाला ।
 आणि उतानचरणाचेया बाला । काइ ध्रुवपदे चाड ॥ २ ॥
 तां वना आला या चि लागीं । जें बैसावें पितेयाचां उत्संगीं ।
 किं सूर्यादिकां लागीं । परि लिंगु जाला ॥ ३ ॥
 ऐसा वनवासियां वश्यु जाला । देतां कवतिकिं तूं चि वेल्हाला ।
 पुत्र पाहातां अजमीला । परत्वानेसी मां ॥ ४ ॥
 जेणें उरीं हालासि पांपरा । तेयाचे विनट बाहासि दातारा ।
 अशुनि वैरियाचिया कलेवरा । विसंबसि ना ॥ ५ ॥
 ऐसा अपकारियां तूझा उपकार । तूं अपात्रीं हीं उदार ।
 दे दान हणौनि दारवठेकार । जालासि बलिचा ॥ ६ ॥

तूतें आराधितां नाइकें । होंती राउवें बोलाविति कवतिकें ।
 तिये वैकुंठीं तुवां गणिके । सुरवाडु केला ॥ ७ ॥
 ऐसी पाहों पाहों वायाणी मीसे ।
 लागसि आपणपें देऊं वानिवसें ।
 तो तू कां अनारिसें ।
 मज लागीं करिसी ॥ ८ ॥
 हां गा दुभतेयाचेनि पवाडें । जे जगाचे फेडी सांकडे ।
 तिये कामधेनूचे पाडे । भूखेले ठांति ॥ ९ ॥
 ह्यौनि विनविलें मियां काहीं ।
 तें देऊं न दखविति हें किं नाहिं ।
 पारि देखावेया पाहीं ।
 पात्रता मज ॥ ११० ॥
 तूझें विश्वरूप आकले । ऐसें करावें गांपालें ।
 तरी चि आर्तिचे डोहाले । पुरती देवा ॥ ११ ॥
 ऐसी ठायेंठाऊं विनती । जवें करूं सरंली सुभद्रापती ।
 तवें तेया षड्गुणचक्रवर्ती । साहवे चि ना ॥ १२ ॥

श्रीभगवानुवाच ।

पश्य मे पार्थ रूपाणि शतशोऽथ सहस्रशः ।
 नानाविधानि दिव्यानि नानावर्णाकृतानि च ॥ ५ ॥
 तो कृपापीयूष सजल । आणि येरु जवळीं आला वरिषाकाल ।
 नाना कृष्ण तो कोकिल । अर्जुनु वसंतु होए ॥ १३ ॥
 ह्यौनि चंद्रबिंब वाटुलें । देखौनि क्षीरसागर उचुंबले ।
 तैसा दुणे ही वारि प्रेमबलें । उल्हासितु जाला ॥ १४ ॥
 मग तिये प्रसन्नतेचेनि आठोपें । गाजौनि ह्यणितलें सकृपें ।
 पार्था देख उमपें । रूपें माझीं ॥ १५ ॥

एक चि विश्वरूप देखावें । ऐंसी मनोरथु केला पांडवें ।
 किं विश्वरूपमय आघवें । करुनि घातलें ॥ १६ ॥
 बापु उदारु देऊ अपरिमितु । याचक सवे सदोदितु ।
 आहंसें सहस्र वरि देतु । सर्वस्व आपुलें ॥ १७ ॥
 आहो शेषाचे डोळे चोरिले । वेद जेया लागि झांकविले ।
 लक्ष्मीये ही परि राहिलें । जिन्हार जें ॥ १८ ॥
 तें आतां प्रकटूनियां अनेकधा । करीत विश्वरूपदर्शनांचा धोंधा ।
 बापु भाग्या अगाधा । पार्थाचेया ॥ १९ ॥
 जो जागतां स्वप्नावस्थे जाण । तो जेवि स्वप्निचें आघवें चि होण ।
 तें चि अनंत ब्रह्मकटाहो आहं । जें आपण जाला ॥ २० ॥
 ते चि सहसा मुद्रा सोडिली ।
 आणि हे स्थूल दृष्टिची जवनीक फेडिली ।
 किंबहुना उघडिली ।
 योगनिधि ॥ २१ ॥
 परि हा देखेल किं नाहिं । ऐंसां सं चि न करी काहिं ।
 एकसरा ह्मणतसे पाही । स्नेहातुरु ॥ २२ ॥
 अर्जुना तुवां एक दावा ह्मणितलें ।
 आणि तें चि दाउं तरि काइ दाविलें ।
 आतां देखें आघवें भरलें ।
 माझां चि रूपीं ॥ २३ ॥
 एकें कृशें एकें स्थूलें । एकें ह्रस्वें एकें विशालें ।
 एकें खुजीं एकें सरलें । अप्रांतें एकें ॥ २४ ॥
 एकें अनावरें प्रांजलें । सव्यापारें येकें निश्चलें ।
 उदासिनें स्नेहालें । तीव्रें एकें ॥ २५ ॥
 एकें घूर्णितें सावधें । आसलगें एकें अगाधें ।
 उदारें अतिबद्धें । क्रुद्धें येकें ॥ २६ ॥

एकें शानें सदमर्दे । स्तब्धें एकें सानंदें ।
 गर्जतें एकें निःशब्दें । सौम्यें एकें ॥ २७ ॥
 एकें साभिलाषें विरक्तें । उन्निद्रें एकें निद्रितें ।
 परि तुष्टें आत्तें । प्रसन्नें एकें ॥ २८ ॥
 एकें सुपूजितें सशास्त्रें । संग्गाथिलीं स्वतन्त्रें ।
 रौद्रें अति मैत्रें । लयस्थें एकें ॥ २९ ॥
 एकें जनलीलाविलासें । एकें पालनशीलें लालसें ।
 एकें संहारकें सावेशें । साक्षिभूतें ॥ ३० ॥
 एवं नानाविधें पारि बहुवसें । आणि दिव्यतेजप्रकाशें ।
 तेविं चि येक येका ऐसें । वर्णिं हिं नव्हे ॥ ३१ ॥
 एकें तातलें साडपन्हरे । तैसें कपिलवर्णें अपारें ।
 एकें सरागें जैसिं सेंदुरें । डग्नरलें नभ ॥ ३२ ॥
 एकें सवियां चि चुलार्किं ।
 जैसें ब्रह्मकटाह खेवणिलें माणार्किं ।
 एकें अरुणोदया सारग्वीं ।
 कुंकुमवर्णें ॥ ३३ ॥
 एकें शुद्ध स्फटिकें सहोजलें । एकें इंद्रनीलसुनीलें ।
 एकें अंजनवर्ण सकालें । कृष्णवर्णें एकें ॥ ३४ ॥
 ल्हासत कांचन पीवलें । एकें नवजलदश्यामलें ।
 एकें चापेगोारिं केवलें । हरितें एकें ॥ ३५ ॥
 एकें तप्तताम्रतांबडीं । एकें श्वेतचंद्रचोखडीं ।
 ऐसीं नाना वर्णें रूपडीं । देख माझिं ॥ ३६ ॥
 हे जैसे कां नाना वर्ण । तैसें प्रकृतीं अनारिसेपण ।
 लाजा कंदर्पु रिगाला शरण । तैसिं सुंदरें रूपें ॥ ३७ ॥
 एकें आयें लावण्यसाकारें । एकें देख अति मनोहरें ।
 श्रिगारश्रियेचीं भांडारें । उघडिलीं जैसीं ॥ ३८ ॥

एकें पीनाबयव मांसले । एकें सुघोरें अति कराळें ।
 एके दीर्घे कातिविमलें । विकटें एकें ॥ ३९ ॥
 एवं नाना विधा आकृती । या पांहातां पार नाहि सुभद्रापती
 यांचां एकी आंगप्राचीं । देख पां जग ॥ १४० ॥

पश्यादित्यान्वसून् रुद्रानश्विनौ मरुतस्तथा ।

बहून्यहृष्टपूर्वाणि पश्याश्चर्याणि भारत ॥ ६ ॥

जेथ उन्मीलन होतसे दीठी । तेथ पसरत आदित्यांचिया मृष्टी ।
 पुढुतीं निमिलिणी मीठी । देत आहाति ॥ ४१ ॥
 वदनाचिये वाफे सवें । होत ज्वालामय आघवें ।
 तेथ पावकादिक पावे । समूह वस्तूचें ॥ ४२ ॥
 आणि भ्रूलतांचे सेवट । कोपें मीळें पांत येकवट ।
 तेथ रुद्रगणाचे संघाट । अवतरत देवां ॥ ४३ ॥
 पै सौम्यतेचा बोलावा । मीति नेणिजे अश्विनौ देवां ।
 श्रोत्रि होत पांडवा । अनेक वायु ॥ ४४ ॥
 या परीं एकैकाचिये लीले । जन्मर्त सुरसिद्धांचि कुले ।
 ऐसि अपारें आणि विशालें । रूपें ये पाहे ॥ ४५ ॥
 जेयातें सांघावेया वेद बोवडे । पाहावेया कालाचें आयुष्य तोकडे ।
 धात्रेया ही परि न संपडे । ठावो जेयांचा ॥ ४६ ॥
 जेयातें देवत्रयी कहि नाइके । तिये इयें देख अनेकें ।
 भोगि आश्चर्याची कवतिकें । महासिद्धी ॥ ४७ ॥

इहैकस्थ जगत्कृत्स्नं पश्याद्य सच्चराचरम् ।

मम देहे गुडाकेश यद्यान्यहृष्टमिच्छसि ॥ ७ ॥

इयां मूर्तिचां किरीटी । रोममूलीं देख पां श्रुष्टि ।
 पर्बति सरुतलवटीं । तृणाक्षुर जैसे ॥ ४८ ॥
 आणि कालायनीं आकाशे । उडस परमाणु दीसति जैसे ।
 भ्रमस क्लृप्तकटाह तैसे । अश्वि वसंधी ॥ ४९ ॥

एथ एकी चि प्रदेशी । विश्व देख पां विस्तरेंसि ।
 आणि विश्वा परौतें मानसि । देखावें वर्से ॥ १५० ॥
 पारि ते ही विषिचें काहि । एथ सर्वथा सांकडें नाहि ।
 सुखें आवडे तें माझां देही । देखसील तूं ॥ ५१ ॥
 ऐसें विश्वमूर्ती तेणें । बोलिलें कारुण्यपूर्णें ।
 तव देखतु आहे कां न झणे । निवांतू चि एरु ॥ ५२ ॥
 एथ तें काइ पां हा उगला । ऐसा कृष्णें येवि पाहिला ।
 तव आसिचें लेणें लेइला । तैसा चि आहे ॥ ५३ ॥

न तु मां शक्यसे द्रष्टुमनेनैव स्वचक्षुषा ।

दिव्यं ददामि ते चक्षुः पश्य मे योगमैश्वरम् ॥ ८ ॥

मग झणे उत्कंठें उहटु न पडे ।
 आझूडं सुखाचि सोय न संपडे ।
 पारि दाविलें तें फुडें ।
 नाकले चि येया ॥ ५४ ॥
 ऐसें बोलौनि देउ हांसिले । कां गा देखणेयां झणितलें ।
 आझीं विश्वरूप तारि दाखविलें । पारि नेदखसि तूं ॥ ५५ ॥
 यया बोला एरें विचक्षणें । झणितलें हां जी तें कवणासि उणें ।
 तुझीं बकाकरवि चांदिणें । चरौ पाहा ॥ ५६ ॥
 हां हो उटूनिया आरिसा । आंधलेया पुढें दाखउं बैसा ।
 ना बहिरीसि हृषीकेशा । गाणें केउतें ॥ ५७ ॥
 मकरंदकणाचा चारा । घालुं जांतां दर्दूरा ।
 वायां धाडा मग सारंगधरा । कोपा कवणां ॥ ५८ ॥
 जें अतींद्रिय झणौनि व्यवस्थलें । केवल ज्ञानें दिष्टिचेवा आगा फीटलें ।
 ते तुझीं चर्मचक्षू पुढां सुदले । मग कैसेनि देखों ॥ ५९ ॥
 पारि तें तुमचें उणें न बोलवें । मों चि साहें तें करवें ।
 एथ आधि झणिवळें देवें । मानूं सपा ॥ ६० ॥

साच त्वि विश्वरूप आलीं दावावें ।
 तरि आधि देखावेया सामर्थ्य देयावें ।
 परि तुज बोवांतां हिं प्रेमभावे ।
 धसाल गेलों ॥ ६१ ॥
 काइ जालें न व्हातां भूमि पेरिजे ।
 तरि तो वेलु किर सिक्किलेयां जाइजे ।
 आतां माझे निज देखिजें ।
 ते दृष्टि देऊं ॥ ६२ ॥
 मग तेया दृष्टी पांडवा । आमचा ऐश्वर्ययोग आघवा ।
 देखौनियां अनुभवा । माक्षिवडा करीं ॥ ६३ ॥
 ऐसें वेदांतवेद्यें । सकललोकआद्यें ।
 बोलिलें आराध्यें । जगाचेनि ॥ ६४ ॥

संजय उवाच ॥

एवमुक्त्वा नतो गंजन् महायोगेश्वरो हारिः ।
 दर्शयामास पार्थाय परमं रूपमैश्वरम् ॥ ९ ॥
 पै कौरवकुलचक्रवर्ती । मज हा चि त्रिस्मो पुडुतीं पुडुतीं ।
 जें श्रियेहूनि त्रिजगतीं । सदैवं असे कवण ॥ ६५ ॥
 ना तरि खुणेचें वानावेया लागि ।
 श्रुती वांचूनि दावा पां जगीं ।
 ना तरि सेवकपण आंगीं ।
 शेषाचां असे ॥ ६६ ॥
 हां हो याचेनि हिं सोसें । सीणति आठै पाहार योगिये जैसें ।
 अनुसरलें गरुडा ऐसें । कोणहीं आहे ॥ ६७ ॥
 परि तें आघवें चि एकीकडे ठेजें । सांपें कृष्णसुखा एकदरें जालें ।
 जिर्ये देउनि कां जन्मले । पांडव हे ॥ ६८ ॥

परि पांचां हिं आंतु अर्जुनां । कृष्णु सविद्यां चि जाला अधीना ।
 कामिकु जैसा अंगना । आपैता कीजे ॥ ६९ ॥
 पढविलें पांखिरुं ऐसें न बोले ।
 या परीं क्रीडामृगु हि संदे न चले ।
 कैसें दैवं एथ सुरवाडलें ।
 तें जाणवेना ॥ १७० ॥
 आजि परब्रह्म हें सावलें । भोगावया सदैवाचे डोले ।
 कां वाचेचे हान लले । पालित कैसें ॥ ७१ ॥
 हा कोपे तरि निवांतु साहे । हा रुसे तरि बुझावितु जाये ।
 नवल पीसें लागलें आहे । पार्थाचें कृष्णां ॥ ७२ ॥
 येन्हविं विषो जीणौनि जन्मले । जे शुक्रदेवादिक दादुले ।
 ते विषो चि वाणिते जाले । भाट येयाचे ॥ ७३ ॥
 हा योगियांचें समाधिधन । किं होउनि ठेला पार्थाधीन ।
 यया लागि विस्मो माझे मन । करितसे राया ॥ ७४ ॥
 तेविं चि संजयो ह्मणे काइसा । विस्मो एथ कौरवेशा ।
 कृष्णे स्वीकरिजे तेया आपैसा । भाग्यउदो होए ॥ ७५ ॥
 मग ह्मणे देवांचा राउ । आतां पार्था तुज ते दृष्टि देऊ ।
 जिया विश्वरूपाचा टाऊ । देखसी तू ॥ ७६ ॥
 ऐसिं श्रीमुखौनि अक्षरें । निगति ना जवं एकसरें ।
 तवं अविद्येचें आंधारें । निगौनि गेलें ॥ ७७ ॥
 मग दिव्य चक्षु प्रकटला । तें ज्ञानदृष्टी पाटा फूटला ।
 या परीं दाखविता जाला । ऐश्वर्य आपुलें ॥ ७८ ॥
 हे अवतार जे सकल । ते जिये समुद्रिचे कां कल्लोळ ।
 विश्व हें मृगजल । जेयां रश्मीतव दीसे ॥ ७९ ॥
 जिये अनादि भूमिके नीटे । चराचर हें चित्र उमटे ।
 तेणें आपणपें वैकुण्ठें । दाखिलें तेया ॥ १८० ॥

मार्गा बलपणें एणें श्रीपती । जे वेलु एकु खादली मती ।
 तें कोपौनियां हाती । यशोदा धारला ॥ ८१ ॥
 मग भेण भेण जैसे । मुखीचा झाडा देयावेयाचेनि मीसे ।
 चौदा ही भुवनें अवकाशें । दाविलीं तियें ॥ ८२ ॥
 नां तरि मधुवनीं धृवासि केलें । जैसे कपोल शकें सितलें ।
 आणि वेदांचिये ही मती ठेलें । तें लागला बोलें ॥ ८३ ॥
 तैसा अनुग्रहो पै राया । श्रीहरी केला धनंजया ।
 आतां कवणी कडे माया । ऐसी भाष नेणे तो ॥ ८४ ॥
 एकसरें ऐश्वर्यतेजें पाहलें । तेया चमत्कारातव एकार्णव जालें ।
 चित्त समजीं बुडालें । विस्मयाचां ॥ ८५ ॥
 जैसा आत्रसपूर्णोदकिं । पन्हे मार्कंडेया एकाएकी ।
 तैसा विश्वरूपीं कवतिकीं । पार्थु लोले ॥ ८६ ॥
 हाणे केवढें गगन अर्थें होतें । तें कवणें नेलें पां परौतें ।
 तियें चराचरें महाभूतें । काइ पां जालीं ॥ ८७ ॥
 दिशांचे ठाये हारपले । अधोर्ध्व काइ नेणों जालें ।
 खेडलेयां स्वप्न गेलें । लोकाकार ॥ ८८ ॥
 नाना सूर्यतेजप्रतापें । चंद्र तारांगण जैसिं लोपे ।
 तैसिं गीलिलीं विश्वरूपें । प्रपंचौनि ॥ ८९ ॥
 तेव्हलि मनासि मनपण न स्फुरे । बुद्धिसि आपणपें न संवरे ।
 इंद्रियांचे रदिम माघारे । हृदय वेन्हीं भरले ॥ ९० ॥
 तेथ तटस्था तटस्थ पडिलें । ठकासि ठक मांडलें ।
 जैसे मोहनास्त्र घातलें । विचारजातां ॥ ९१ ॥
 तैसा विस्मितु पाहे कोडें । तव पुढां चतुर्भुज होतें रूपडें ।
 तें चि नानारूप चौहीं कडे । मांडौनि ठेलें ॥ ९२ ॥

अनेकवक्त्रनयनमनेकाङ्गुतदर्शनम् ।

अनेकदिव्याभरणं दिव्यानेकोद्यतायुधम् ॥ १० ॥

जैसे बरिखाकालिचें मेहुडें । कां महाप्रलङ्घचें तेज जेव्हडें ।
 तैसे आपणेनि विण कव्हणी कडे । नेंदी चि उरों ॥ ९३ ॥
 मग देखे तेथ सैध वदनें । जैसि रमणिकाचीं राजमुवनें ।
 नाना प्रकटलीं निधानें । लावण्यांचीं ॥ ९४ ॥
 किं आनंदाचिं वनें सांसिनलीं । जैसी सौंदर्या राणीव जोडली ।
 तैसि मनोहरें देखिलीं । हरिवक्त्रें तेणें ॥ ९५ ॥
 तेया हि मार्जि एकैकें । सवियां चि भयानकें ।
 कालरात्रीचीं कटकें । उठावलीं जैसीं ॥ ९६ ॥
 किं तियें मरणासी चि मुखें जालीं ।
 नां तरि भयाचि दुगें पानासिलीं ।
 महाकुंडें उघडिलीं ।
 प्रलयानलाचीं ॥ ९७ ॥
 तैसिं अद्भुतें भयासुरें । तेथ वदनें देखिलीं वीरें ।
 आणिकें हीं साधारणें साकारें । सौम्यें हिं बहुते ॥ ९८ ॥
 पै ज्ञानदृष्टीचेनि अवलोकें । परि वदनाचा सेवदु न टके ।
 मग लोचन ते कवतिकें । लागला पाहों ॥ ९९ ॥
 तव नानावर्णें कमलवनें । विकाशलिं तैसिं अर्जुनें ।
 डोलां देखिलीं पालिंगणें । आदित्यांचिं जैसिं ॥ १०० ॥
 तेथ कृष्णमेघांचिया झांटी । माझि कल्पांतविजृचिया फूटी ।
 तैसिया वन्हीं पिंगला दीठी । भ्रुवां तलीं ॥ १ ॥
 एकैक आश्चर्य पाहतां । तिये येकी चि रूपि पांडुसुता ।
 दर्शनाची अनेकता । प्रतिस्फालिली ॥ २ ॥
 मग झणे चरण ते कवणी कडे । केउते मुकुट दोर्दडे ।
 ऐसि वाढविताहे कोडें । चाडा देखांवया ॥ ३ ॥
 तेथ भाग्यनिधी पार्था । कां विफल होईल मनोरथा ।
 काइ पिन्पक्षपणिचां भातां । वयकाडें आयि ॥ ४ ॥

ना तरि चतुराननाचिये वाचे । आहाति लटकेयां अक्षरांचे सांचे ।

झणौनि साद्यंतपण अपाराचें । देखिलें तेणें ॥ ५ ॥

जेयाची सोये वेदां न कळे । तेयाचे अवयव एके वेले ।

अर्जुनाचे दोन्ही डोळे । भोगिते जाले ॥ ६ ॥

चरणौनि मुगुटु वेन्हीं । देखतु विश्ववरूपाची थोरी ।

जे नाना रत्न अलंकारी । मिरवतसे ॥ ७ ॥

परब्रह्म आपुलेनि आंगें ।

लेयाविया आपण चि जाला जियें अनेगें ।

तिर्यें लेणीं मी सांचें ।

काइसेया सारिखि ॥ ८ ॥

जिये प्रभेचिया झलाला । उजालु चंद्रा आदित्यमंडला ।

जें महातेजाचा जिवाला । जेणें विश्व प्रकटे ॥ ९ ॥

तें दिव्य तेज श्रिंगार । तो कवणाचिये मती होईल गोचर ।

देऊ आपणपें लेइला तें वीर । देखतसे ॥ २१० ॥

मग तो चि विज्ञानाचां डोळां । घाली करपलुवां जव सरलां ।

तव तोडिति कल्पांतिचिया ज्वाला । तैसिं शस्त्रें देखिलीं ॥ ११ ॥

जेयाचेयानि किरणांचेनि खरंपणें । नक्षत्रांचे होंति फुटाणे ।

तेजें खिरडला वन्हि ह्मणें । समुद्रि रिगों ॥ १२ ॥

कालकूटकल्लोलीं कवलिलें । नाना महा अविद्यांचें दांग उमटलें ।

तैसे अपार कर देखिले । उद्यतायुधीं ॥ १३ ॥

दिव्यामालयांबरधर दिव्यगंधानुलेपनम् ।

सर्वाश्चर्यमयं देवमनंतं विश्वतोमुखम् ॥ ११ ॥

किं भेणें तेथींनि काढिली दीठां । मग कटमुगुट पांतसे किरीटी ।

तव सुरतरुचिया शृष्टी । जेया पासौनि जालिया ॥ १४ ॥

जियें महासिद्धिचीं मूलपीठें । सीणली कमला जेथ वावटे ।

तिर्यें कुसुमें अति चोंखटें । तुरंबिलीं देखिलीं ॥ १५ ॥

मुकुटां वरि स्तवक । ठाई ठाई पूजाबंध अनेक ।
 कंठि रूलताति अलौलिक । मालादंड ॥ १६ ॥
 स्वर्गे सूर्यतेज वेढिलें । जैसे पन्हरेनि मेरुतें मढिलें ।
 तैसें तें वरि गाढिलें । पीतांबर झलके ॥ १७ ॥
 श्रीमहादेउ कर्पूरें उटिला । कां कैलासु पारजें उबारिला ।
 नाना क्षीराब्धि पांगुरविला । क्षीरोदकें ॥ १८ ॥
 कां तरि चंद्र मेघाची घडी उकलली ।
 मग गगना करवि वृंथि घेवविली ।
 तैसी चंदनपिंजरी देखिली ।
 सर्वांगीं तेणें ॥ १९ ॥
 जेणें प्रकाशा कांति चढे । ब्रह्मानंदाचा दाघु मोडे ।
 जें ब्रह्माचेनि जीवन सौरभ्यें जोडे । वेधवतिये ॥ २० ॥
 जेयांचें निर्लेपु अनुलेपन करी । जे निर्लेपु ही सर्वांगीं धरी ।
 तेया सुगंधाची धोरी । कवण पां वानीं ॥ २१ ॥
 ऐसी एकैक श्रिंगारशोभा । पाहातां अर्जुनु जांतसे क्षोभा ।
 तेविं चि देउ बैसला कीं उभा । शयानु हें नेणे ॥ २२ ॥
 बाहिरि दीटि उघडूनि पाहे ।
 तव आघवें मूर्तिमय देखतु आहे ।
 आणि न पाहों ह्यणौनि उगा चि राहे ।
 तरि आंतु ही तैसें चि ॥ २३ ॥
 विशाल रूपें समोर देखे । तेया भेण पाठिमोरा जव ठाकें ।
 तव तिकडें हीं श्रीमुखें । कर चरण तैसें चि ॥ २४ ॥
 आहो पांतां किर प्रतिभासे । येथ नवल सांधो पां कांइ असे ।
 परि न पांतां हिं दीसे । चोज आइका ॥ २५ ॥
 कैसें अनुग्रहाचें करणें । पार्थाचें पाहणें आणि न पाहणें ।
 तेया ही सकद नारायणें । व्यापूनि घातलें ॥ २६ ॥

क्षणौनि आश्चर्याचां पुरीं एकीं । पडिला ठायें ठा३० थडीं टाकी ।
 तबं चमत्काराचां आणिकिं । महार्णविं पडे ॥ २७ ॥
 ऐसा अर्जुनु असाधारणें । आपुलेया दर्शनाचेनि विदारणें ।
 कबलौनि घेतला तेणें । अनंत रूपें ॥ २८ ॥
 तो विश्वतोमुख स्वभावें । आणि तें चि दाखवावेया पांडवें ।
 प्रार्थिला आतां आघवें । होउनि ठेला ॥ २९ ॥
 आणि दीपें कां सूर्यें प्रकटे । अथवा निमृटिलेयां देखावें कुंठे ।
 तैसी दीटि नव्हे जे वैकुंठें । दीधली आहे ॥ २३० ॥
 क्षणौनि किरीटीसि दोहिं परीं । देखावें पडतसे अवधारीं ।
 हें संजयो हस्तिनापुरीं । सांघतसे राया ॥ ३१ ॥
 क्षणे किंबहुना अवधारिलें । पार्थें विश्वरूप देखिलें ।
 नाना आभरणीं भरलें । विश्वतोमुख ॥ ३२ ॥

दिवि सूर्यसहस्रस्य भवेद्युगपदुत्थिता ।

यदि भाः सदाशे सा स्याद्भासस्तस्य महात्मनः ॥ १२ ॥

तिये अंगप्रभेचा हेवा । नवला३० काइसेया सारिखा सांघावा ।
 कल्पांतिं येकु चि मेलवा । द्वादशादित्यांचा ॥ ३३ ॥
 तैसे ते दिवि सूर्य सहस्र वेन्हीं ।
 जरि उदैजते कां येकिं अवसारिं ।
 तरि तेया तेजाची थोरी ।
 उपमूं येती ॥ ३४ ॥
 आघवेयां विजुंचा मेलवा कीजे ।
 आणि प्रलयाम्नीची सर्व सांधणी सांधिजे ।
 तेविं चि हेशकु ही मेलविजे ।
 महातेजाचा ॥ ३५ ॥
 तन्हीं तिये अंगप्रभेचेनि पाडें । हें तेजादि पै थोडें ।
 आणिक तेया ऐसें चोखडें । आन नाहिं ॥ ३६ ॥

ऐसे माहात्मियां हरिचें साहाज । फांकत असे सर्वांगिचें तेज ।
ते मुनिकृपा जी मज । दृष्ट जालें ॥ ३७ ॥

तत्रैकस्थं जगत्कृत्स्नं प्रविभक्तमनेकधा ।

अपश्यदेवदेवस्य शरीरे पांडवस्तदा ॥ १३ ॥

आणि तिथे विश्वरूपिं येक कडे । जग आघर्वें आपुलेनि पवाडें ।
जैसे समुद्रा माझि बुडडे । साने दीसति ॥ ३८ ॥
कां आकाशीं गंधर्वनगर । भूतलिं पिपीलिका बांधलें घर ।
नातरि मेरूवरि सपूर । परमाणु बैसले ॥ ३९ ॥
विश्व आघर्वें चि तिया परीं । तेया देवचक्रवर्तिचां शरीरीं ।
अर्जुनु तिथे अवसरीं । देखता जाला ॥ २४० ॥

ततः स विस्मया विष्टो दृष्टोरोमा धनंजयः ।

प्रणम्य शिरसा देवं कृतांजलिरभाषत ॥ १४ ॥

तेथ विश्वा एक आपण । ऐसें अलुमाळु होतें दूजेपण ।
ते आटौनि गेलें अंतष्करण । विरालें सहसा ॥ ४१ ॥
आंतु महानंदा चेडरें जालें ।
बाहीरि गात्रांचें बल हारपौनि गेलें ।
आपाद पां गुंतलें ।
पुलकांचलें ॥ ४२ ॥
वारिषियेचिये प्रथम दशे । वोहललेया शैलाचें सर्वांग जैसे ।
विरुढे कोवलां अंकुरीं तैसे । रोमांच आले ॥ ४३ ॥
सितला चंद्रकरीं । जैसा सोमकांतु पाल्हाळु धरी ।
तैसिया स्वेदकणिका शरीरीं । दाटती असति ॥ ४४ ॥
माझि सांपडलेनि अलिउलें । जला वरि कलिका जेवि आंदोले ।
ते विश्वासोर्मीचेनि बलें । कांपतसे ॥ ४५ ॥
कर्पूरकदलिचीं गर्भपूटें । उकलति कर्पूराचेनि कोंधाटें ।
पुलिका गलति तेवि थेंबटे । नेत्रौनि पडति ॥ ४६ ॥

ऐसा सात्विका आठां हिं भावां । परस्परें वर्त्ततसे हेवां ।
 तेथ ब्रह्मानंदाची जीवा । राणीव फावली ॥ ४७ ॥
 उदैलेनि मुधाकरें । जैसा भगला चि समुद्रु भरे ।
 तैसा बेलबेलां उर्मीभरें । उचंबलतसे ॥ ४८ ॥
 तैसा तेया मुखानुभवा पाठिं । केला द्वैताचा सांभालु दीठी ।
 मग उससांनि किरीटी । वास पाहिली ॥ ४९ ॥
 तेथ बैसला होंता जेया सवा ।
 तेया चि कडें मस्तक खालविलें देवा ।
 जोडुनु करसंपुटु बग्वां ।
 उत्तरीं बोलें ॥ २५० ॥

अर्जुन उवाच ।

पश्यामि देवांस्तव देव देहे सर्वांस्तथा भूतविशेषसंघान् ।
 ब्रह्माणमीशं कमलासनस्थं कर्षींश्चसर्वानुरगांश्च दिव्यान् ॥१५॥
 मग ह्मणे जय जय स्वामीं । नवल कृपा केली तुझीं ।
 जें विश्वरूप आझीं । प्राकृते देखों ॥ ५१ ॥
 परि साच भलें केलें स्वामियां । मज परितोखु जाला गा सांवियां ।
 जो देखिलासि मियां । इये श्रृष्टीसि आश्रो ॥ ५२ ॥
 देवा मंदराचलाचेनि आंगलगें । ठांड ठांड स्वापदाचे थोगे ।
 तैसिं तूझां देहीं अनेगें । देखतसें भुवनें ॥ ५३ ॥
 आहो आकाशाचिये खोले । दीसति प्रहगगाचि कुलें ।
 कां महावृक्षांवारि आंविसालें । पक्षजातींचीं ॥ ५४ ॥
 तिया परीं श्रीहरी । तूझां विश्वात्मके इये शरीरीं ।
 स्वर्ग देखतसे अवधारीं । मुरगणेंसि ॥ ५५ ॥
 प्रभूतांचें पंचक । पथ देखतसें मीं अनेक ।
 वांत असे भूतग्रामक । भूतश्रृष्टीचें ॥ ५६ ॥

जी सत्यलोक तुज माजि आहे । देखिला चतुराननु हा नोहे ।
 आणि एक जवं पाहे । तवं कविलासु एथ आहे ॥ ५७ ॥
 श्रीमहादेउ भवानि ऐसी । तूझां देखत असे एकीं अंशीं ।
 आणि तूतें गा रिखीकेशी । तुच माजि देखें ॥ ५८ ॥
 पै कश्यपादि ऋषिकुलें । ये तूझां स्वरूपीं सकलें ।
 देखत असें पातालें । पन्नगेसि ॥ ५९ ॥
 किंबहुना कैवल्यपती । तूझेया अवयवा एकाचिये भीती ।
 इयें चतुर्दश भुवनें तिये असती । आश्राइलीं जाणें ॥ ६० ॥
 आणि तेथिचे जे जे लोक । ते चित्रचरना अनेक ।
 ऐसें देखतसें अलौकिक । गांभीर्य तूजें ॥ ६१ ॥

अनेकबाहुदरवक्त्रनेत्रं पश्यामि त्वां सर्वतोऽनंतरूपम् ।

नातं न मध्यं न पुनस्तत्त्वादिं पश्यामि विश्वेश्वर विश्वरूपम् ॥ १६ ॥

यां दिव्यचक्षूचेनि पैसें । चांहीकडे जवं पाहांत असे ।
 तवं दोईडीं जेंसें । आकाश कोभेलें ॥ ६२ ॥
 तैसें एक निरंतर । देखतसें तूजें कर ।
 करीति आवयें चि व्यापार । येका कालीं ॥ ६३ ॥
 मग महामुखाचेनि पैसारें । उतरलीं ब्रह्मकटाहाचिं भांडारें ।
 तैसिं देखतसें अपारें । उदरें तूझीं ॥ ६४ ॥
 जी सहस्र शीर्ष याचे डाखले । कोडिवरि होताति येकें वेलें ।
 कां परब्रह्म चि वदनफलें । मोडानि आलें ॥ ६५ ॥
 तैसिं वक्त्रें ज्येहुतीं तेउतीं । तूझीं देखतसें विश्वमूर्ती ।
 आणि तेया चि परी नेत्रपंक्ती । अनेका संघ ॥ ६६ ॥
 हें असो स्वर्गपाताल । कां भूमि दिशा अंतराल ।
 हे विवक्षा टेली सकल । भूर्तिमय देखतसें ॥ ६७ ॥
 तुवां विण कोणहीं कडे । परमाणु हिं एतुला कोडें ।
 अवकाशु पाहांत असे पारि न संपडे । व्यापिलें ऐसें तुवां ॥ ६८ ॥

इयें नाना अपरिमितें । सांटविलीं होंतीं महाभूतें ।
 तेतुष्य ही पवाडु तुवां अनंतें । कोंदला देखें ॥ ६९ ॥
 ऐसा कवणी ठाउनि तूं आलासि ।
 येथ बेठा कां उभा आहासि ।
 आणि तूं कवणाचां पोटीं होंतासि ।
 तूझें ठाण केवढें ॥ ७० ॥
 तूझें रूप अवयव कैसे । तुज पैलीकडे काइ असे ।
 तूं काइसेयावरि आहासि ऐसें । जव पाहिलें मियां ॥ ७१ ॥
 तव देवा तूं चि । जाला अससि आघवें चि ।
 तूं कोणहाचा ही न्हवसि ! अनादिसिद्ध ॥ ७२ ॥
 तूं उभा ना बैठा । दीर्घ ना खुजटा ।
 तुज तलीवारि वैकुंठा । तूं चि आहासि ॥ ७३ ॥
 तूं रूपें आपणपेयां आपणेयां चि ऐसा ।
 देवा तूं चि तूझी क्यासा ।
 पाठि पोट परेशा ।
 तूझें चि तूं ॥ ७४ ॥
 किंवाहुना आतां । तुज तूं चि अनंता ।
 हें पुढुतीं पुढुतीं पाहांतां । देखिलें मियां ॥ ७५ ॥
 परि तूझेया रूपा आंतु । जी उणीव एकि असें देखतु ।
 जें आदि मध्य अंतु । यें तीन्हीं नाहिं ॥ ७६ ॥
 येन्हांचि गिवसलेयां आघवां चि टांइ ।
 परि सोय नेदखें चि केहीं ।
 सणौनि त्रिशुद्धी हें नाहिं ।
 तीन्हीं एथ ॥ ७७ ॥
 एवं आदिमध्यांतरहिता । विश्वेश्वर अपरिमिता ।
 तूं देखिलासि जी तत्वता । विश्वरूपा ॥ ७८ ॥

तुज महामूर्तिचा आंगी । उमटलिया मूर्ती अनेगी ।
 लेइलासि वाणे परिची आंगी । ऐसा आवडतु आहसि ॥ ७९ ॥
 हों काज महोदधी तूं देवा । जालासि तरंगमूर्त्ती हेलावा ।
 किं तूं वृक्षु येकु बरवा । मूर्त्तिफलीं फललासि ॥ ८० ॥
 जी भूतल भूरुहि मांडलें । जैसें नक्षत्रीं गगन गूढलें ।
 तैसें मूर्त्तिमय भरलें । तूझे देखतसें रूप ॥ ८१ ॥
 जी येकैकाचां आंगप्रांतीं । हों जाउं पुरतसे त्रिजगती ।
 एवाडिया तूझां आंगीं मूर्त्ती । रोमा जालिया ॥ ८२ ॥
 ऐसा पवाडु मोडौनि विश्वाचा । तूं कोणु पां एथ कैचा ।
 ऐसें पाहे तव आमचा । सारथी तो तूं ॥ ८३ ॥
 तारि मज पांतां मुकुंदा । तूं ऐसा चि व्यापकु सर्वदा ।
 मग भक्तानुग्रहें तेयां मुग्धां । रूपांतें धरीसि ॥ ८४ ॥

किरीटिनं गदिनं चक्रिणं च तेजोराशिं सर्वतोद्दीप्तिमंतम् ।
 पश्यामि त्वां दुर्निरीक्ष्यं समंताद्दीप्तानलार्कद्युतिमग्रमेयम् ॥ १७ ॥
 नोहे तो चि हा शिरीं । मुकुटु लेइलासि हरी ।
 पुणु आतां चि तेज आणि थोरी । नवल किरु बहुवेंस ॥ ८९ ॥
 ४१

तें चि हें बरिली हातीं । चक्र परिजितेया आइती ।
 संवरितासि विश्वमूर्त्ती । ते न म्मेडे खुण ॥ २९० ॥
 एरीकडे ते चि हे न्हवे गदा ।
 आणि तलिली दोन्हीं भुजा निरायुधा ।
 वागारे संसारावेया गोविंदा ।
 संवसारिलिया ॥ ९१ ॥
 आणि तेणें चि वेगें सहसा । माझेया मनोरथा सरिसा ।
 जालासि विश्वरूप विश्वेशा । लणानि जाणें ॥ ९२ ॥
 परि काइसें वापा हें चोज । विस्मो करावेया मज ।
 चित्त होउनि जात निर्वूज । आश्रयपणें ॥ ९३ ॥
 एथ आधि कां नाहिं । ऐसें विवरू नेंथे पाहिं ।
 नवल अंगप्रभेची नवलई । कोंदली संघ ॥ ९४ ॥
 एथ अग्निची दीटि करपत । सूर्य कोडि एक हारपत ।
 एसणें तीव्रपण अद्भुत । तेजाचें येया ॥ ९५ ॥
 हों काज प्रकाशाचां महार्णवीं । बुडानि गेली सृष्टि आघवी ।
 किं युगांतविद्यूचां पालवीं । झाकोललें गगन ॥ ९६ ॥
 नाना संहारतेजाचिया ज्वाला । तोड्ढनि मांचु बांधला अंतराला ।
 आतां दिव्य ज्ञानाचां हिं डोलां । पाहावे ना ॥ ९७ ॥
 उजालु अधिका अधिकु बहुवसु । धडाडितु असे अतिदासु ।
 पडतु दिव्य चक्षूसि त्रामु । निहालितां ॥ ९८ ॥
 नातारे महातेजाचा भडाडु । होता कालाग्निरुद्राचां ठाई गूडु ।
 तो तृतीय नेत्राचा मदु । फूटला जैसा ॥ ९९ ॥
 तैसें पसरलेनि प्रकाशें । पांचवनेया ज्वालांचे वलसे ।
 पडतां ब्रह्मकटाह कौलिसे । होत दीसति ॥ ३०० ॥
 ऐसा अद्भुत तेजोगशि । जन्मा नवलु मियां देखिलासि ।
 नेणवे व्यासि जी कैसी । पार तूझे ॥ १ ॥

त्वमक्षरं परमं वेदितव्यं त्वमस्य विश्वस्य परं निधानम् ।
त्वमव्ययः शाश्वतधर्मगोप्ता सनातनस्त्वं पुरुषो मतो मे ॥ १८ ॥

देवा तूं अक्षर । आउठाविये मात्रेसि पर ।
भृती जेयाचे घर । गिवसिती आहाति ॥ २ ॥
जें आकाराचें आयतन । जें विश्वनिक्षेपैकनिधान ।
तें अव्यक्त तूं गहन । अविनाश जी ॥ ३ ॥
तूं धर्माचा वोलावा । अनादिसिद्ध तूं नीच नवा ।
मीं जाणें सततीसावां । पुरुषविशेषु पुढा ॥ ४ ॥

अनादिमध्यांतमनंतवीर्यमनंतबाहुं शशिसूर्यनेत्रम् ।
पश्यामि त्वां दीप्तहुताशवत्क्रं स्वतेजसा विश्वमिदं तपंतम् ॥ १९ ॥

तूं आदिमध्यरहितु । स्वसामर्थ्ये तूं अनंतु ।
विश्वबाहु अपरिमितु । विश्वचरणु ॥ ५ ॥
पै चंद्रचंडाशु डोलां । दावितासि कौपप्रसादलीला ।
एका रुससि गोपाला । एके पालीसि तूकें ॥ ६ ॥
जी एंवविधु तूतें । मीं देखतसे हें निरुतें ।
पेटलें प्रलयाग्निचें उजितें । तैसें वक्त्र हें तूजें ॥ ७ ॥
निहेटले पर्वत । कवळनि ज्वालाचे उभडु ऊठित ।
तैसे चाटित दाढ दांत । जीभ लले ॥ ८ ॥
इये बदनिचिया उवा । आणि सर्वा आंगकांतिचिया प्रभा ।
विश्व तातलें अतिक्षोभा । जांत असे ॥ ९ ॥

द्यावापृथिव्योरिदमंतरं हि व्याप्तं त्वयैकेन दिशश्च सर्वाः ।
दृष्ट्वाद्भुतं रूपमुग्रं तवेदं लोकत्रयं प्रव्यथितं महात्मन् ॥ २० ॥

जें कां चौलोकपाताल । पृथिवी हान अंतराल ।
अथवा दिशा विदिशा समाकुल । दिशाचक्र ॥ ३१० ॥
हें आघवें चि तुवां एके । भरलें देखतुसें कक्तुकें ।
पारि मगन हीं सकट भयानकें । आप्लविजे जेवि ॥ ११ ॥

नातरि अद्भुतरसाचां कल्लोलीं । जालां चौदा भुवनासि काडिपाली ।

तैसें आश्चर्य हें कलीं । कैसेनि मीं ॥ १२ ॥

जी नावरे व्यासि असाधारण । न साहे तेजाचें उग्रपण ।

सुख दूरि गेलें पारि प्राण । विपायें धरी जग ॥ १३ ॥

अमी हि त्वा सुरसंघा विशंति

केचिद्भीताः प्रांजलयो गृणन्ति ।

स्वस्तीत्युक्त्वा महार्षिसिद्धसंघाः

स्तुवंति त्वां स्तुतिभिः पुष्कलामिः ॥ २१ ॥

देवा देखौनिया तूतें । नेणां कैसें भयासि आलें भारितें ।

आतां दुःखकल्लोलीं झलवतें । तीन्हीं भुवनें ॥ १४ ॥

यन्हविं तुज महात्मेयांचें देखणें ।

तारि भयदुःखा होआवें मल्हावणें ।

पारि हें नव्हैल जेणें गुणें ।

तें जाणवलें मज ॥ १५ ॥

जवं तूझें रूप नोहे दीठें ।

तवं जगा संसारिक गोमटें ।

मग आतां देखिलासि तारि विषय—विटें ।

उपनला त्रासु ॥ १६ ॥

तेविं चि तूतें देखिलेयां साठीं । काइ सहसा देउं येईल मीठी ।

आणि नेंदीं तारि संकटीं । राहों केवि ॥ १७ ॥

झणौनि मागां तवं सवंसारु । काढत येतसे अनिवारु ।

आणि पुढां तवं अपारु । नैयेसि घेउं ॥ १८ ॥

ऐसा माझारिली सांकडां । सांपडलेयां त्रैलोक्याचा होंतु डुरडा ।

हा वन्हि जी फुडा । चोजवला मज ॥ १९ ॥

जैसा आरंबलला आगी । समुद्रासि ये निवावेया लागी ।

तवं पाण्यांचां तरंगीं । अधिका भिये ॥ २० ॥

तैसैं जगासि जी जालें । तूतें देखौनि तलमलीत ठेलें ।
यां माझि पैल भलें । हे ज्ञानियांचे मेलवे ॥ २१ ॥
हे तूझेनि चि अंगिकें तेजें । जाळुनु सकल कर्माचीं बीजें ।
मिळति तुज आंतु नीजें । सद्भावेंसि ॥ २२ ॥
आणि हें सवियां चि भयभीर । सर्वस्वें धरुनि तूझी मोहर ।
पार्थिताति कर । जोडूनियां ॥ २३ ॥
देवा थोरी मोहार्णवीं पडिलों । विषयवागुरें आंतुडलों ।
स्वर्गसंसाराचां सांपडलों । दोहि आंगि ॥ २४ ॥
ऐसें आमचें सोडवणें । तुज वांचौनि कीजेल कवणें ।
तुज शरण आलों सर्वप्राणें । हणत देवा ॥ २५ ॥
आणि महारिखी अथवा सिद्ध । कां विद्याधरसमूह विविध ।
हे तुज बोलस्वस्तिवाद । करिताति स्तुती ॥ २६ ॥

रुद्रादित्या वसवो ये च साध्या विश्वेऽश्विनौ मरुतश्चोष्मपाश्च ।
गंधर्वयक्षासुरसिद्धसंधा वोक्षंते त्वां विस्मिताश्चैव सर्वे ॥ २७ ॥

हे रुद्रादित्यांचे मेलवे । वसु हान साध्ये विश्वे ।
अश्विनौ देव आघवे । वायु हे जी ॥ २७ ॥
अवधारां अग्नि हान गंधर्व । पैल रक्षोगण सर्व ।
जी महेंद्र—मुख्य देव । कां सिद्धादिक ॥ २८ ॥
हे आघवे चि आपुलां लोकीं । सौम्यांगि अवलोकीं ।
महामूर्ति दैविकी । पाहांत असति ॥ २९ ॥
ऐसें पाहांत पाहांता तूतें प्रतिक्षणीं ।
विस्मित होत अंतष्करणीं ।
करिति निज मुगुटीं बोवाळणीं ।
प्रभू तुज ॥ ३० ॥
तेथ जयजयबोषकलरवें । स्वर्ग गाजताति आघवे ।
ठेवित ललाटांवरि बरवे । करसंप्रद ॥ ३१ ॥

तिये विनयद्रुमांचिये आरवीं । सुरवाडली सात्विका भार्गवी ।
 क्षणौनि करसंपुष्टपाळवी । तूं होतासि फल ॥ ३२ ॥
 जी लोचनभाग्य उदैले । जीवीं सुखाचें सुयाण पाहलें ।
 जें अगाध तूझें देखिलें । विश्वरूप इहीं ॥ ३३ ॥
 हें लोकव्यापक रूपडें । पाहांतां देवां हिं चवक पडे ।
 एयाचें सदमुखपण जोडे । भलेतेया कडौनि ॥ ३४ ॥

रूपं महत्ते बहुवक्त्रनेत्रं महाबाहो बहुबाहुरूपादम् ।
 बहूदरं बहुदंष्ट्राकरालं दृष्ट्वा लोकाः प्रव्यथितास्तथाहम् ॥२३॥
 एसें एक चि परि विचित्रें । आणि भयानकें तें चि बहुवक्त्रें ।
 बहूलोचन तियें शस्त्रें । अनंतभुजा ॥ ३५ ॥
 हे अनंत चरण । बहूदरें आणि नाना वर्ण ।
 कैसें प्रतिवदनीं मातलेपण । आवेशाचें ॥ ३६ ॥
 हों काज महाकल्पांचां अंती ।
 मुखें पसरलीं आहाति जेउततेउतीं ।
 आगियलावरि उजितीं ।
 आबुथिलीं जैसीं ॥ ३७ ॥
 नातारें संहारत्रिपुरेचि यत्रें । किं प्रलयभैरवांचि क्षेत्रें ।
 नाना युगांतचक्रिं पात्रें । भूतषिचां वोडविलीं ॥ ३८ ॥
 तैसीं जीउतीतिउती कडे । तूझीं वक्त्रें जी प्रचंडें ।
 उफाडति दारिये माझि सिंहाडे । तैसे दांत दीसति रागीठ ॥३९॥
 जैसें कालरात्रिचें आंधारें । उसपतां निगति संहारखेचरें ।
 तैसिया वदनीं प्रलयरुधिरें । काटलिया दाढा ॥ ३४० ॥
 हें असो कालें आवांतिलें रण । कां सर्वसंहारें मातलें मरण ।
 तैसें अति भिगुलवाणेपण । वदनाचें तूझें ॥ ४१ ॥
 हे बापुडी भूतशृङ्गी । मोटके येवि करीं पाहिले दीठी ।
 आणि दुःखकालिंदीचां तटीं । झाड होउनि ठेली ॥ ४२ ॥

तुज महामृत्युचां सागरीं । आतां हें त्रैलोक्य अवधारिं ।
 शोकदुःखलहरीं । आंदोलत असे ॥ ४३ ॥
 एथ कोपौनि जारि वैकुंठें । ऐसें हान ह्मणिल अवचटें ।
 जें तुज काइ लोकाचें वाटे । तूं ध्यानीं चि भोगीं ॥ ४४ ॥
 तारि लोकांचे किर साधारण । वायां आपण करितसें वोडण ।
 केवि सहसा ह्मणों प्राण । माझे चि कांपताति ॥ ४५ ॥
 आणि रुद्रु जेया वासिपे । मज भेण मृत्यु लपे ।
 तो मीं एथ थरथरां कांपें । ऐसें केहि नाहिं ॥ ४६ ॥

नमःस्पृशं दीप्तमनेकवर्णं

व्यात्ताननं दीप्तविशालनेत्रं ।

दृष्ट्वा हि त्वां प्रव्यथितांतरात्मा

धृतिं न विंदामि शमं च विष्णो ॥ २४ ॥

परि नवल हे महामारि । एया विश्वरूपाची पारि ।
 जें भयासुरपण हरी । आणितसे ॥ ४७ ॥
 करुनि महाकालेंसि तठें । तैसिं तोंडें जाळीं रागिटें ।
 तीं वाढौनियां धाकुटें । स्वर्ग केलें ॥ ४८ ॥
 हें गगनाचेनि वाडपणें नाकलें ।
 त्रिभुवनिचेया ही वोरया न वेंटालें ।
 ययाचिये वाफेचिया आगी जलें ।
 सचराचर हें ॥ ४९ ॥
 तेविं चि येकसारिखें नोहे । एथ वर्णाचा वाणिभेदु आहे ।
 हों काज सवा३० प्रलयीं लाहे । वन्हि याचा ॥ ५० ॥

दंष्ट्राकरालानि च ते मुखानि दृष्ट्वैव कालानलसन्निभानि ।

दिशो न जाने न लभे च शर्म त्रसीद् देवेश जगन्निवास ॥ २५ ॥

जेयाचिये आगिची दीप्ति एवढी । हें त्रैलोक्य करी राखौंढी ।
 किं तेया ही तोंडें पारि लोंखीं । आणि दांतदाढा ॥ ५१ ॥

कैसे बोरयासि वायु चलला । समुद्रासि किं महापूर आला ।
 नातारि विखाम्रीसि प्रवर्त्तला । वडवानल ॥ ५२ ॥
 हलाहल आगी पियाळें । किं मरणासि मरण पेटलें ।
 तैसें संहारतेज जालें । वदनीं देखां ॥ ५३ ॥
 परि कोणें मानें विशाल । जैसें तुटलें होये अंतराल ।
 नांतारि आकाशासि कव्हाल । पडौनि ठेलें ॥ ५४ ॥
 कां कांखे सुनि वसुंधरी । जें हिरण्याक्षु रिगाळा विवरीं ।
 तें उघडलें हटकेश्वरु वेन्हीं । जेवि पातालकुहर ॥ ५५ ॥
 तैसा वक्त्राचा या विकाशु । माझि जीभे वेगला चि आवेशु ।
 विश्व न पुरे क्षणौनि घांसु । न भरी आवडे ॥ ५६ ॥
 आणि पातालव्यालाचां फुत्कारीं । गरलजाला लागति अंबरीं ।
 तैसी पसरलिये वदनदरी । माझि जिह्वा दीसे ॥ ५७ ॥
 काढूनि प्रलयविजूर्चीं जुंबाडें । मग पानासिले गगनाचे डुडे ।
 तैसे आवालुवां वरि आंकुडे । दीसति दाढांचे ॥ ५८ ॥
 आणि ललाटपटाचिये खोले । कैसे भयातें भेडविति डोले ।
 नातारि महामृत्यूंचे उमाले । कडवसीं राहिले ॥ ५९ ॥
 ऐसें दाउनियां महाभयाभोज । एथ काइ निफजउं पांतासि काज ।
 तें नेणों परि भद्र मज । रोकडें आलें ॥ ६० ॥
 देवा विश्वरूप पाहावेयाचे डोहले ।
 केले तियें पातलों गा प्रतिफलें ।
 जी देखिलासि आतां डोले ।
 निवाले योगे ॥ ६१ ॥
 आहो देह पार्थिव किर जाए ।
 आणि याची काकुलति कोणहां आहे ।
 परि आतां चैतन्य माझे विपायें ।
 घांचे एथ ॥ ६२ ॥

यन्हवि भयातव आंग कांपे । नावेक आगलें तारे मन तांपे ।
 अथवा बुद्धि वासिपे । अभिमानु विसरिजे ॥ ६३ ॥
 परि येतुलेया वेगला । जो केवल आनंदैककला ।
 तेया अंतरात्मेयां निश्चला । सेयारी आली ॥ ६४ ॥
 बापु साक्षात्कारे वेधु । कैसा देशधडी केला बोधु ।
 हा गुरुशिष्यसंबंधु । विपायें नांदे ॥ ६५ ॥
 देवा तूझां इये दर्शनीं । जें वैकल्य उपनलें आहे अंतष्करणीं ।
 तें संवरावेया गिवसणी । करीतसे धैर्याची ॥ ६६ ॥
 तव माझेनि नावें धैर्य चि हारपलें ।
 किं तेया विश्वरूपदर्शन तेणें जालें ।
 हें असो परि भलें ।
 आंतुडलें उपदेशा ॥ ६७ ॥
 जीउ त्रिसंवावेयाचिया चाडा । सैव धांवांधांवि कारितसे बापुडा ।
 परि सोये किं कव्हणी कडां । आथि हो कां ॥ ६८ ॥
 ऐसें विश्वरूपाचिया महामारी । तरासिं गेलें आहे चराचरीं ।
 जी न बोलें तरि काये करीं । महाविष्णू ॥ ६९ ॥
 पै अखंड डोलेंयां पुढें । फूटलें जैसें महाभयाचें भाडें ।
 तैसि तूझि मुखें वितंडें । पसरलिं देखें ॥ ७० ॥
 असो दाढादातांचिया दाटी । न पांगुरवे दोही वोंटि ।
 सैव प्रसयशस्त्रांची कांटी । लागली जंसी ॥ ७१ ॥
 जैसें तक्षका विष भरलें । कां कालरात्री मुख पसरलें ।
 किं अग्न्यस्त्र परजिलें । वज्राग्नी जेवि ॥ ७२ ॥
 तैसि तूझीं वक्त्रें प्रचंडें । वरि आवेशु बाहि बोसंडे ।
 आले मरणरसाचे लोंढे । आह्मावरि ॥ ७३ ॥
 संहारसमैचा चंडानीलु । आणि महाकल्पांतीं प्रलयानलु ।
 यां दोहिं होये जै मेलु । तै काय एक न जले ॥ ७४ ॥

सैसिं संहारें तूझीं मुखें । देग्वौनि धीरु के आह्वां पारुखे ।
 आतां भुललां दिशा मीं नेदखें । आपणपें जी ॥ ७५ ॥
 मोटके विश्वरूप डोलां देखिलें । आणि सुख तें हातौनि पडिलें ।
 आतां जांपाणिजांपाणीं आपुलें । अस्तोव्यस्त हें ॥ ७६ ॥
 एथ ऐसें करिसीं ह्मणौनि जरि जाणें ।
 तरि हो गोठी चि कां करणें ।
 आतां येकोल वांचिजे प्राणें ।
 ऐसें जालें ॥ ७७ ॥
 जरि गोसांविं माझा अनंता ।
 तरि सुई वोंडण माझेया जीविता ।
 सांटाविं पसारा मागौता ।
 महामारिचा ये ॥ ७८ ॥
 आइकैं सकल देवांचिये देवते । तूझेनि चैतन्ये गा विश्व वसतें ।
 तें विसरलासि हें उपरतें । मांडिलें एथ ॥ ७९ ॥
 ह्मणौनि प्रसन्न होई वेगीं राया । संहारीं आपुली माया ।
 काढीं मातें महाभया । पासांनियां ॥ ८० ॥
 हा ठावोवेन्हीं पुढुतीपुढुती । तूतें ह्मणिजे बहुवा काकुलती ।
 ऐसा मी विश्वमूर्ती । भंडु कां जी ॥ ८१ ॥
 जें अमरावतिथे आला धाडा । तें मिया येकलेनि केला उबेदा ।
 जो मीं कालाचेया ही तोंडा । वासिपु न धरि ॥ ८२ ॥

अमीच त्वां धृतराष्ट्रस्य पुत्राः

सर्वे सहैवावनिपालसंघैः ।

भीष्मो द्रोणः सूतपुत्रस्तथासाँ

सहास्मदीयैरपि योधमुख्यैः ॥ २६ ॥

परि तेया आंतुल हे न्हवे देवा । एथ मृत्यु हं करुनि चढावा ।

तुबां आतां चि घोंटु भरावा । एसा सूचना ॥ ८३ ॥

कैसा न्हवता प्रलयाचा वेलु । गोखां तूं चि मांडला काळु ।
 बापुडा हा त्रिभुवनगोलु । अल्पायु जाला ॥ ८४ ॥
 आहा भाग्या विपरीता । विघ्न उठिलें शांति करितां ।
 कटा विश्व गेलें आतां । तूं लागलासि ग्रासूं ॥ ८५ ॥
 हें नव्हे मां रोकडें । सैव पसरूनियां तोंडें ।
 कवलितासि चौहींकडे । सैन्यें इयें ॥ ८६ ॥
 नव्हे कोरवकुलीचे अंकुर । आंधलेया भृतराष्ट्राचे कुमर ।
 हे गीलिले सपरिवार । वदनीं इहीं ॥ ८७ ॥
 आणि जे जे यांचेनि सावाये ।
 आले असति देशोदेशिचे राये ।
 तेयांचे सांघावेया जावो न व्हाये ।
 ऐसें सरकटितु आहासि ॥ ८८ ॥
 मदमुखांचिया घटा । घेंतु आहासि घटघटां ।
 आरणीं हान थाटां । देंतासि मिळि गा ॥ ८९ ॥
 जंत्रांवारि चि मार । पदतींचे मोगर ।
 मुखा आंतु भार । हारपति मां ॥ ९० ॥
 क्रिदांताचे जावलीं । जें एकैक विश्वातें गीली ।
 तिर्ये कोडिवारि सगलीं । घेताति शस्त्रें ॥ ९१ ॥
 चातुरंगपरिवारा । सजोडियां राहंवरां ।
 दांत न लवीसि परमेश्वरा । कैसा तुष्टलासि ॥ ९२ ॥
 हां गा भीष्मा ऐसा ब्राह्मणु । सल्ये शौर्ये आहे निपुणु ।
 तो ही गीलिला आणि द्रोणु । ग्रासिला सकटा ॥ ९३ ॥
 आगा सहस्रकराचा कुमरु । पथ गेला गेला कर्णवीरु ।
 आणि आमचेयां आघवेयांचा केरु । फेडिला देखों ॥ ९४ ॥
 कटाकटा घात्रेया । कैसें जालें अनुग्रहा या ।
 मियां मागौनि जगा बापुडेया । आणिलें कर्म ॥ ९५ ॥

मार्गे थोडिया बहुवा उपपत्ती ।
 येणें सांघितलेया निकेयानि विभूती ।
 तैसा नसें चि मा पुडुतीं पुडुतीं ।
 बैसलां मरों ॥ ९६ ॥
 लणौनि भोग्य तें त्रिशुद्धी न चुके ।
 आणि बुद्धि होणियेरा सारिखी ठाके ।
 माक्षां कपालिं पीटावें छेकें ।
 तें लोपेल काइसेया ॥ ९७ ॥
 पूर्वीं अमृत ही हाता आलें । परि देव नसती चि उगले ।
 मग कालकूट उठिलें । जिया परीं ॥ ९८ ॥
 परि तें येक बग थोडें । केलेयां प्रतिकारा माझिवडें ।
 आणि तिये अवसरिचें सांकडें । निस्तरला शंभु ॥ ९९ ॥
 आतां हा जलतु वारा वेंटाले । कवणां विखा भरलें गगन गिले ।
 महाकालेंसिं फलें । कवण करी ॥ १०० ॥
 ऐसा दुःखें अर्जुनु सीणतु । शोचीतु असे जीवा आंतु ।
 परि नेदखे तो प्रस्तुतु । अभिप्रा३० देवाचा ॥ १ ॥
 जें मीं मारिता कौरव मरते । ऐसेनि वेंटालिला असे भ्रातें ।
 तें फेडावया चि लागि अनंतें । दाविलें निज ॥ २ ॥
 अरे कोण्ही कव्हणातें न मरी । एथ मीं चि हो सर्वसंहारी ।
 तें विश्वरूप व्याजें श्रीहरी । प्रकटितसे ॥ ३ ॥
 ऐसेया देवाचेया मनोगता । तें न चोजवे चि पांडुसुता ।
 मग आहा कंपु नव्हता । वाढवितसे ॥ ४ ॥

वक्राणि ते त्वरमाणा विशन्ति दंष्ट्राकरालानि भयानकानि ।
 केचिद्विलग्ना दशनांतरेषु संदृश्यन्ते चूर्णितैरुत्तमांगैः ॥ २७ ॥
 तेथ लणे हा एके वेलें । असकी गवसीं दोन्हीं दलें ।
 बहनिं जमालें । मगनीं जैसिं ॥ ५ ॥

कां महाकल्पाचां सेवटीं । जें कृदांतु कोपला होये शृष्टी ।
 तें एकविसां स्वर्गा ही मीठी । पातालासि दे जैवि ॥ ६ ॥
 नातरि उदासीनें दैवें । संचकाचीं विभवें ।
 जेथिचा तेथ स्वभावें । वायां जांति ॥ ७ ॥
 तैसि सांचलीं सैन्यें एकावटें । इये मुखि जालिं प्रविष्टें ।
 परि एक ही तोंडा न सुटे । कैसें कर्म देखां ॥ ८ ॥
 अशोकाचे आगसे । चघलिले कन्हेनि जैसे ।
 लोकवक्त्रा माझि तैसे । वायां चि गेले ॥ ९ ॥
 परि सिसालें मुगुटेंसि । पडिलें दाढाचां सांडसि ।
 पीठ होंतां कैसीं । दीसताति ॥ १० ॥
 तियें रत्नें दांतांचा व्याडि । कूट लागलें जीभे बूडी ।
 काहिं काहिं आगरडीं । दंष्ट्राचीं माखलीं ॥ ११ ॥
 हों काज विश्वरूपें कालें । ग्रासिलें लोकांचि बालें ।
 परि गिवसीत देहिचि सिसालें । पैसें इयें राखिडीं ॥ १२ ॥
 तैसीं शरीरा माझि चोखडीं । होंतीं उत्तमांगिं रोकडीं ।
 ह्यगौनि महाकालाचां तोंडीं । परि उरलें शेपीं ॥ १३ ॥
 मग ह्यणे जी हें काइ । जन्मलेयानि मोहर नाहिं ।
 जग आपैसें चि वदनडोहीं । संचरतसे मां ॥ १४ ॥
 इया आघविया चि शृष्टी ।
 लागलिया आहाति वदनाचां वाटि ।
 आणि हा जेथिचा तेथ मीठी ।
 देत असे उगा ॥ १५ ॥
 ब्रह्मादिक समस्त । ऊंचा मुखा माजि धावंत ।
 येर सामान्य हे भरत । ऐली वदनीं ॥ १६ ॥
 आधिक ही भूतजात । तें उपनलां चि ठाईं ग्रासित ।
 धारि पाचेया मुखा निभ्रांत । न सुटे चि काहिं ॥ १७ ॥

यथा नदीनां बहवोऽबुधेगाः

समुद्रमेवाभिमुखा द्रवन्ति ॥

तथा तवामी नरलोकबोरा

विशन्ति वक्राण्यभिविज्वलन्ति ॥ २८ ॥

जैसे महानदीचे ओघ । वैल्हे टाकीति समुद्राचें आंग ।

तैसें आघवां चि कडोनि जग । प्रवेशे एथ ॥ १८ ॥

आयुष्यपथें प्राणिगर्णी । करुनि अहोरात्रांची सुअर्णी ।

वेगें वक्रमिलणीं । साधिजत आहाति ॥ १९ ॥

यथा प्रदीपज्वलनं पतंगा

विशन्ति नाशाय समृद्धवेगाः ॥

तथैव नाशाय विशन्ति लोका

स्तवापि वक्राणि समृद्धवेगाः ॥ २९ ॥

जलतेया गिरिचेया आंगवखां ।

माक्षि घालिति पतंगाचिया झांका ।

तैसे लोक देखां ।

इये वदनीं पडत ॥ ४२० ॥

परि जेतुलें एथ प्रवेशलें । तें जाणां लोहें पाणिं गीलिलें ।

आणि वहिवटीं पूसलें । नात्रं तेयाचें ॥ २१ ॥

लेलिह्यसे ग्रसमानाः संमता

लोकान्समग्रान्धनैर्ज्वलद्भिः ॥

तेजोभिरापूर्यजगत्समग्र

भासस्तवोग्राः प्रनपन्ति विष्णो ॥ ३० ॥

आणि येतुली हे आरोगण । करितां भूखे नाहिं उणेपण ।

कैसें दीपन असाधारण । उदैलें एथ ॥ २२ ॥

जैसा रोगिया ज्वराहूनि उठिला । कां भणगा दुकाल पाहला ।

तैसा जीभेचा नत्रला^{३०} देखिला । आवाळुवें चाटिता ॥ २३ ॥

जैसे आहाराचेनि नावें काहीं ।
 तोंडाचिया वाटा न वचे चि नाहिं ।
 कैसी शमशमिते पाहा नवाई ।
 भूखैलेपणांची ॥ २४ ॥
 काह सागराचा घोंटु भरावा । किं पर्वताचा घांसु करावा ।
 ब्रह्मकटाहो घालावा । असका दाढे ॥ २५ ॥
 दिशां सगलिया गिलाविया । चांदण्यां चाटूनु घेयाविया ।
 ऐसें वर्ततसे नां सत्रियां । लोलुपता बा तुज ॥ २६ ॥
 जैसा भोगें कामु वाढे । इंधनें आगीसि बल चढे ।
 तैसि खांतखांतां तोंडें । खांखांतें ठेलीं ॥ २७ ॥
 कैसें एक चि केवढें पसरलें । त्रिभुवनं जिह्वाप्रीं टेंकलें ।
 जैसें कविठ घातलें । वडवानलीं ॥ २८ ॥
 तैसि अपारें वदनें । आतां एतुलीं कैचि त्रिभुवनें ।
 कां आहार न मेलवितां एणें मानें । वाढविलें असति ॥ २९ ॥
 आगा लोकु हा बापुडा । जाला वदनज्वालां वरिपडा ।
 जैसि वणवेयाचां वेढां । सांपडलीं मृगें ॥ ३० ॥
 आहा तैसें या विश्वा जालें । देउ न्हवे हें कर्म आलें ।
 किं जग जलचरीं पांगिलें । जालकालें पै ॥ ३१ ॥
 आतां इये अंगप्रभेचिये वागुरे ।
 कोणीकडौनि निगिजैल चराचरें ।
 वक्त्रे न्हवति जैसीं जौहरें ।
 बोडवलिं जगा ॥ ३२ ॥
 आगि आपुळेनि दाहकपणें । न पांले चि झणौनि तो नेणे ।
 परि जेया झणो तेयां प्राणें । सूटिका नाहिं ॥ ३३ ॥
 साक्षेनि तिखटपणें । कैसें निवटे हें शस्त्र काह जाणें ।
 कां आपुळेयां मारातें नेण । विख जैसें ॥ ३४ ॥

आख्याहि मे को भवानुग्ररूपो
नमोऽस्तु ते देववर प्रसीद ।

विज्ञातुमिच्छामि भवंतमाद्यं
न हि प्रजानामि तव प्रवृत्तिम् ॥ ३१ ॥

तैसी तुज काहिं । आपुलेया उग्रपणाची सैं चि नाहिं ।

परि अइलीकडे खाई । सरली जगाची ॥ ३१ ॥

आगा आत्मा तूं चि एकु । सकलविश्वव्यापकु ।

तरि आह्मासि कां अंतुक । वोडवलासि ॥ ३२ ॥

तरि भिया सांडिली जीविताची चाड ।

आणि तुवां हिं न धरावी भीड ।

मनीं आहिं तें उघड ।

बोल पां मुखें ॥ ३३ ॥

केती त्राय करिसी या उग्ररूपा ।

आंगिचें भगवंतपण आठविं वापा ।

नाहिं तन्हि कृपा ।

मज पुरती पाहीं ॥ ३४ ॥

तरि एकु बेलु वेदवेद्या । त्रिभुवनाचेया आद्या ।

विनवणी विश्ववंद्या । आइक माझी ॥ ३५ ॥

ऐसें बोलौनियां वीरें । चरण नमस्कारिलें शिरें ।

मग हणें जी सर्वेश्वरें । अवधारिजो ॥ ४४० ॥

भिया होआवेया समाधान । पूसिलें विश्वरूप ध्यान ।

तवं येकें चि बेलें त्रिभुवन । गीलितू चि उठिलासि ॥ ४१ ॥

तरि तूं कोणु काये येतुलीं । इयें भयानकें मेलविलीं ।

आघवां चि करि घेतलीं । शस्त्रें काह्या ॥ ४२ ॥

तुवां देखें रागिठपणें । वाढीं गगन केलें ठेंगणें ।

डोळे करुनि भिगुलवाणे । भेडवितु आह्मासि ॥ ४३ ॥

एथ कृदातेसि देवा । काइसेया कीजतसे हेवा ।
हा आपुला तुवां सांघावा । अभिप्रा३० मज ॥ ४४ ॥

भीमगवानुवाच ।

कालोऽस्मि लोकक्षयकृत्प्रवृद्धो
लोकान्समाहर्तुमिह प्रवृत्तः ।
ऋतेऽपि त्वां न भविष्यन्ति सर्वे
येऽवस्थिताः प्रत्यनीकेषु योधाः ॥ ३२ ॥

या बोला क्षणतसे अनंतु । मीं कोणु हें अससि प्रसतु ।
आणि काइसेया लागि असें वाढतु । हे चलबल काइसी ॥ ४५ ॥
तारं मीं कालु गा हें फुडें । लोकु संहारावेया वाढें ।
सैध पसरिलीं असति तोंडें । तरि ग्रासूं आघवां ॥ ४६ ॥
तेथ अर्जुनु क्षणे कटा । उभगला मागिलां संकटां ।
आलविला तवं वोखटा । उधाइला हा ॥ ४७ ॥
तेविं चि कठिनें बोले आशतूटि । अर्जुनु होईल हिंपुटी ।
क्षणौनि सर्वे चि क्षणे किरीटी । पारि आन एक असे ॥ ४८ ॥
जें आतां चि इये संहारवाहारे । तुझीं पांडव बाहिरे ।
तेथ जांत जांत धनुर्द्धरे । संवरिले प्राण ॥ ४९ ॥
होंता मरणमहामारी गेला । तो माघौता सावदु जाला ।
मग चित्त दे३० लागला । बोला तेया ॥ ४५० ॥
तवं ऐसें क्षणितले देवें । तुझीं माझे जाणावें ।
एर मज आघवे । सरले ग्रासुं ॥ ५१ ॥
बडवानलीं प्रचंडीं । जैसी टाकूनि घापे कुरौंडी ।
तेसें जग माझां तोंडीं । तुवां देखिलें जें जें ॥ ५२ ॥
पारि तेथ माझारि काहीं । भरवसेनि उणें नाहिं ।
इये वायां चि सैन्यें पाहिं । बरवतें आहाति ॥ ५३ ॥

जे हे मेलौनियां मेले । भूगत वीरवृत्तीचेनि बलें ।
 जमावार जगदलें । वाखाणिताति ॥ ५४ ॥
 ह्मणति श्रृष्टिवार श्रृष्टि करुं । आण वाउनि मृत्युतें धरुं ।
 जगाचा भरुं । घोटु आतां ॥ ५५ ॥
 पृथिवी सगली चि गीळुं । पारि हें आकाश वरिचा वारि जाळुं ।
 काइ बाणवारि खीळुं । वोरयातें ॥ ५६ ॥
 चतुरंगाचिया संपदा । करिति महाकालेंसि स्पर्धा ।
 बांढिबोचिया मदा । बलघले जे ॥ ५७ ॥
 बोळ हातीयेरांडुनि तीखट । दीसति आगीपासौनि दासट ।
 मारकपर्णे कालकूट । महुंर ह्मणति ॥ ५८ ॥
 ते हे लेपाचे गमले । जाण पोकलिचे उमाले ।
 आगा चांदांचीं फलें । वीर हे देखें ॥ ५९ ॥
 जैसा भृगजलाचा पूर आला । दल नव्हे कापडाचा साँपु केला ।
 इया श्रिंगारुनि खाला । मांडिलिया पै ॥ ६० ॥
 येर चेष्टवितें जें बल । तें भियां मागां चि प्रासिलें सकल ।
 आतां कोल्हैरिचे वेताल । तैसे निर्जीव हे ॥ ६१ ॥
 हालविती दोरी तूटली । तारे तिये खांबावरिलें बाउली ।
 आवडेतेणें लोटिलीं । उलथौंगि पडति ॥ ६२ ॥

तस्मात्त्वमुत्तिष्ठ यशो लभस्व ।

जित्वा शत्रून्भुंक्ष्व राज्यं समृद्धम् ।

मयैवैते निहताः पूर्वमेव ।

निमित्तमात्रं भव सैन्यसाधिन ॥ ३३ ॥

तेंसा सैन्याचा एया बगा । मोडता वेळु न लगे पै गा ।
 ह्मणौनि उठिं उठिं वेगां । सिहाणा हाड ॥ ६३ ॥
 तुवां चि गोप्रहणींचेनि अवसरें । घातलें मोहनास एकसरें ।
 मग घोर्याचेनि बापें उत्तरें । आसुडुनि वल्लें नेळें ॥ ६४ ॥

आतां हे तेयां निपेटारे जाले । निवटि बहिला रणि सांपडलें ।
 वेइं यश रिपु जीतले । एकलेनि पै ॥ ६५ ॥
 आणि कोरडें यश गा नोहे । समग्र राज्य हाता येत आहे ।
 तूं निमित्तमात्र होए । सव्यसाची ॥ ६६ ॥

द्रोणं च भीष्मं च जयद्रथं च ।
 कर्णं तथाभ्यानपि योधवीरान् ।
 मया हतांस्त्वं जहि मा व्यथिष्ठा ।
 युद्धस्य जेतासि रणे सपत्नान् ॥ ३४ ॥

द्रोणाचा पाडु न करीं । भीष्माचें भय न धरीं ।
 कैसेनि कर्णावारि । परजूं हें न ह्मण ॥ ६७ ॥
 कवणु उपाओ जयद्रथा कीजे । हें तुवां चित्ति न धरिजे ।
 आणिही आधि जेजे । नावणिगे ॥ ६८ ॥
 ते हे येकें येकु आवये । चित्रिचे सिंहाडे मानावे ।
 वांलेनि हातें धेयावे । प्रसूनियां ॥ ६९ ॥
 एयां वारि पांडवां । काइसा जूझाचा मेलावा ।
 हा आभासु गा आघवा । येर आकर्षिलें मियां ॥ ७० ॥
 जेव्हालि तुवां देखिले । माझां वदनीं पडिले ।
 तेव्हां चि एयांचें सरलें । आतां रिति सोंपें ॥ ७१ ॥
 ह्मणौनि बहिला उठीं । मियां आहाले तूं निवटीं ।
 न रिग शोकसंकटीं । नाथिलिये ॥ ७२ ॥
 आपण चि आडखला कीजे । कवतिकें जैसा विधिजे ।
 तैसें देखें तूझें । निमित्त आहे ॥ ७३ ॥
 आगा उभारूं जें उदैलें । तें तव परतें गेलें ।
 आतां राज्येंसि संचळें । यश तूं भोगि ॥ ७४ ॥
 जेव्हालि उतत होंते दायाद । आणि बलिये जमि दुर्मद ।
 ते बघिले रिपु विशद । शौर्य यांचें ॥ ७५ ॥

ऐसिया ह्या गोठी । विश्वाचां वाक्पटि ।
लिडुनि घालीं किरीटी । विजया होई ॥ ७६ ॥

संजय उवाच ॥

एतच्छ्रुत्वा वचनं केशवस्य
कृताञ्जलिर्वेपमानः किरीटी ।
नमस्कृत्वा भूय एवाह कृष्ण
सगद्गदं भीतभीतः प्रणम्य ॥ ३५ ॥

ऐसी अघवी चि हे कथा । तेया पूर्ण मनोरथा ।
संजयो सांघे कौरवनाथा । ज्ञानदे० ह्मणे ॥ ७७ ॥
मग स्वर्गलोकांनि गंगाजल । सूटलेयां वाजति खलाल ।
तैसी वाचा विशाल । बोलतां तेया ॥ ७८ ॥
नातरि महामेघांचे उमाले । घडघडीत एके वेळे ।
कां घुमघुमी मंदराचले । क्षीराब्धि जैसा ॥ ७९ ॥
तैसें गंभीरें महानादै । हें वाक्य विश्वकंदे ।
बोलिलें अगाधें । अनंतरूपें ॥ ८० ॥
तें अर्जुनें मोटकें आइकिलें । आणि सुख किं भय चि दुणावले
हें नेणों परि कल्पिलें । सर्वांग तेयाचें ॥ ८१ ॥
सकरुणपणें बळला मोट । मग जोडिले करसंपुट ।
बेलबेलां ललाट । चरणीं ठेवी ॥ ८२ ॥
तेविं चि काहिं बोलों जाए । तारि गळा बुजाला ठाए ।
सुख किं भय होये । तें विचारा तुझीं ॥ ८३ ॥
परि तेव्हलि देवाचेनि बोलें । अर्जुना ऐसें हें जालें ।
भियां पदांवारि देखिलें । श्लोकिंचेयां ॥ ८४ ॥
मग तैसा चि भेणभेण । पुडुतीं जुहारी चरण ।
ह्मणे जी आपण । ऐसें बोलिलें ॥ ८५ ॥

अर्जुन उवाच ।

स्थाने दृष्टीकेश तव प्रकीर्त्या
जगत्प्रहृष्यत्यनुरज्यते च ॥
रक्षांसि भीतानि दिशो द्रवन्ति
सर्वे नमस्यन्ति च सिद्धसंघाः ॥ ३६ ॥

नां अर्जुनां मीं कालु । आणि विश्व प्राप्ति तो माझा खेळु ।
हा बोलु किरु अढळु । मानुं आर्हो ॥ ८६ ॥
परि जी तुवां कालें । आजि स्थितिचिये वेले ।
प्रासिजे हें न मिले । विचारासि ॥ ८७ ॥
कैसेनि आंगिचें तारुण्य मोडावें । कैचें वृद्धाप्य काढावें ।
हणौनि करुं हणसि तें न्हवे । बहुत करुनि ॥ ८८ ॥
आगा चौपाहारी न भरतां । कहिं चि देखैं अनंता ।
मध्यान्हीं चि सविता । मालवत नाही ॥ ८९ ॥
पैं तुज अखंडिता काला । तीनि आहाति वेला ।
या तीन्ही परि सबला । आपुलां समैं ॥ ९० ॥
जेव्हलि हों लागे उत्पत्ति । तेव्हलि स्थितिप्रलयो हारपति ।
स्थितिकालीं न मिरवति । उत्पत्तिप्रलयो ॥ ९१ ॥
पाठि प्रलयाचिये वेले । उत्पत्तिस्थिति मावले ।
हें काइसेनि हिं न ढले । अनादि ऐसैं ॥ ९२ ॥
हणौनि आजि भरें भोगें । स्थिती वर्त्तिजत आहे जगें ।
येथ प्रासिसि हें न लगे । माझां जीवीं ॥ ९३ ॥
तव संकेतें देऊ बोलें । आगा या सैन्या भरण पूरलें ।
तें प्रत्यक्ष तुज दाविलें । येरां यथाकालें जाण ॥ ९४ ॥
हा संकेतु जब अनंता । वेळु लागला बोलतां ।
तव अर्जुनें लोकु मागौता । स्थिती देखिला ॥ ९५ ॥

मग अर्जुनु ह्मणे देवा । तूं सूत्री विश्वलाघवा ।
 जगु आला जी आघवा । स्थिती पुढुती ॥ ९६ ॥
 परि पडिलेयां दुःखसागरीं । तूं काढिसि कां जिया परीं ।
 ते कीर्त्ति तूझी हरी । आठवीतसें ॥ ९७ ॥
 आठवितां वेळोवेलां । भोगिजत महामुखाचा सोहला ।
 तेथ हर्षामृतकल्लोलां । वरि लोलत असें ॥ ९८ ॥
 देवा जियालेपणें जगु । धरिति तूझां ठांडें अनुरागु ।
 आणि दृष्टांतेयां भंगु । अधिका अधिकु ॥ ९९ ॥
 पै त्रिभुवानिचेयां राक्षसां । महाभय तूं रुषीकेशा ।
 पलताति यां दिशां । पैलीकडे ॥ ५०० ॥
 येर सुरसिद्धकिन्नर । किंबहुना चराचर ।
 तूतें हर्षनिर्भर । नमित असे ॥ १ ॥

कस्माच्च ते न नमेरन्महात्मन् ।

गरीयसे ब्रह्मणोऽप्यदिकर्त्रे ।

अनंत देवेश जगन्निवास ।

स्वमक्षरं सदसत्तत्परं यत् ॥ ३७ ॥

एथ हां गा कवणा कारणां । राक्षस होंत नारायणां ।
 न लगती चि चरणा । पलते जाले ॥ २ ॥
 आणि तूतें हें काइ पूसावें । एतुळें आह्मासि पै जाणवें ।
 हां गा सूर्योदयीं राहावें । कैसेनि तमें ॥ ३ ॥
 तूं स्वयंप्रकाशाचा आगरु । आजि जाला अससि गोचर ।
 ह्मणौनि येयां केरु । फीटला सहजें ॥ ४ ॥
 हें एतुले दिवस आह्मां । काहिं नेणवे चिं श्रीरामां ।
 आतां देखतसे महिमा । गंभीर तूझी ॥ ५ ॥
 जेथौनि नाना सृष्टीचिया बोलीं । पसरति भूतप्रामांचिया बेळी ।
 तेया ब्रह्मातें व्याली । दैविकी इछा ॥ ६ ॥

दे३० निःसीमगुण अनंतु । दे३० निःसीमतत्त्व सदोदितु ।
 दे३० निःसीमसाम्य सतंतु । चौ हि वांचा ॥ ७ ॥
 जी तूं त्रिजगती ॐलात्रा । अक्षर तूं सदाशिवा ।
 तूं संतासंत देवा । तेयां ही अतीत ते तूं ॥ ८ ॥

त्वमादिदेवः पुरुषः पुराण

स्त्वमस्य विश्वस्य परं निधानम् ।

वेत्तासि वेद्यं च परं च धाम

त्वया तत्तं विश्वमनंतरूपम् ॥ ३८ ॥

तूं प्रकृतिपुरुषांची आदि । जी महातत्त्वांची अवधी ।
 स्वयें तूं अनादि । पुरातनु ॥ ९ ॥
 सकल विश्वासि जीवन । जीवांसि तूं निधान ।
 भूतभव्याचें ज्ञान । तूझां चि हार्ति ॥ ५१० ॥
 जी श्रुतींचेया लोचना । स्वरूपसुख तूं अभिन्ना ।
 तूं त्रिभुवनिचिया आयतना । आयतन तूं ॥ ११ ॥
 ह्यगौनि जी परम । तूते ह्यणिजे महाधाम ।
 कल्पांती महद्ब्रह्म । तूझां अंकीं रिगे ॥ १२ ॥
 किंबहुना देवें । विश्व विस्तारलें आघवें ।
 आतां अनंतरूप वानावें । कवणें तूझें ॥ १३ ॥
 जी काइ एक तूं न्हवसि । तूं कवणी ठाईं गा नससि ।
 हें असौं जैसा आहासि । तैसेया नमो ॥ १४ ॥

वायुर्यमोऽग्निर्वरुणः शशांकः

भ्रजापतिस्त्वं प्रपितामहश्च ।

नमो नमस्तेऽस्तु सहस्रकृत्वा

बुधश्च भूयोऽपि नमो नमस्ते ॥ ३९ ॥

वायु तूं अनंता । यमू तूं नियमिता ।

प्राणिजाणीं वसता । अग्नि जी तूं ॥ १५ ॥

वरुण तू सोमु । स्रष्टा तू ब्रह्म ।
 पितामहाचा परमु । आदिजनकु तू ॥ १६ ॥
 आणिक ही जें जें काहिं । रूप अथवा नाहिं ।
 तेया नमो तुज पाहीं । जगन्नाथा ॥ १७ ॥
 ऐसें सानुरागें चित्तें । स्तवन केलें पांडुसुतें ।
 मग पुढुतीं ह्मणे नमस्ते । नमो प्रभू ॥ १८ ॥
 पाठिं तिथे साद्यंते । निहाली मूर्त्तिंतें ।
 पुढुतीं ह्मणे नमस्ते । नमो प्रभू ॥ १९ ॥
 इयें चराचरीं समस्तें । अखंडित देखें तेयांतें ।
 आणि पुढुतीं ह्मणे नमस्ते । नमो प्रभू ॥ २० ॥
 ऐसिं देखौनि अद्भुतें । आश्चर्य होतसे मातें ।
 तव तव ह्मणे नमस्ते । नमो प्रभू ॥ २१ ॥

नमः पुरस्तादथ पृष्टतस्ते
 नमोस्तु ते सर्वत एव सर्व ॥
 अनंतवीर्यामितविक्रमस्त्वं
 सर्वं समाप्नोषि ततोसि सर्वः ॥ ४० ॥

आणिकि स्तुति नाठवे । आणि निवांत हिं न न्हावे ।
 नेणों कैसा प्रेमभावे । गाजों चि लागे ॥ २२ ॥
 किंबहुना इया परी । ननम केलें सहस्र वेन्हीं ।
 पुढुतीं ह्मणे श्रीहरी । तुज सन्मुखा नमो ॥ २३ ॥
 देवांसि पाठि आथि कां नाहिं । येणें आह्मां उपेगु काइ ।
 तरि तुज पाठिमोरयासि ही । नमो स्वामी ॥ २४ ॥
 आतां बेगलालेयां हिं अवेवां । नेणें रूप करूं देवा ।
 ह्मणौनि नमो तुज सर्वा । सर्वव्यापका ॥ २५ ॥
 जी अनंतबलसंभ्रमा । तुज नमो अनंतविक्रमा ।
 सकलकालें समा । सर्वदेशा ॥ २६ ॥

आघवां अवकारिं जैसैं । अवकाशु होउनि आकाश असे ।
तूं सर्वपणें तैसैं ॥ पातलासि सर्व ॥ २७ ॥
किंबहुना केवल । सर्व हें तूं चि निखल ।
आगा क्षीरार्णवीं कळोल । पयाचे जैसे ॥ २८ ॥
हणौनियां देवा । तूं वेगला न्हवसि सर्वा ।
हैं आलें मज सद्गवा । आतां तूं चि सर्व ॥ २९ ॥

सखेति मत्वा प्रसभं यदुक्तं

हे कृष्ण हे यादव हे सखेति ।

अज्ञानता महिमानं तवेदं

मया प्रमादात्प्रणयेन वापि ॥ ४१ ॥

पारि ऐसेया तूतें स्वामीं । काहीं नेणों चि जी आह्मीं ।
हणौनि संबंधधर्मीं । राहाटलों तुसीं ॥ ३० ॥
आहा थोर वाउर जालें । अमृतें संमार्जन केलें ।
वृषभु घेउनि दीधलें । कामधेनूतें ॥ ३१ ॥
परिसु हाता आला । तो नेणौनि गा डौरां घातला ।
कल्पतरूचा केला । कूपु सेता ॥ ३२ ॥
चिंतामणिची खाणि देखिली ।
पारि नोळखे चि हणौनि अन्हेरिली ।
तैसी तूझी जवलीक धाडिली ।
सांघातीपणें ॥ ३३ ॥
हैं आजिचें चि पाहे पां रोकडें । कवण जूझ हें केवडें ।
एथ परब्रह्म तूं उघडें । सारथी केलासि ॥ ३४ ॥
एयां कौरवांचेया घरा । शिष्टाड्ये धाडिलासि दातारा ।
ऐसा वणेसाठिं जागेश्वरा । वीकिलासि जी ॥ ३५ ॥
तूं योगियांचें समाधिसुख । कैसैं जाणों चि ना मूर्ख ।
उरोधु तुसीं सदमुख । करूं देवा ॥ ३६ ॥

क्षणौनि त्रिभुवनीं तूं एकु । तुज सारिसा ना अधिकु ।
तूक्षा महिमा अलोलिकु । नेणिजे वानु ॥ ५९ ॥

तस्मात्प्रणम्य प्रणिधाय कायं
प्रसादये त्वामहमीशमीड्यम् ।
पितेव पुत्रस्य सखेव सख्युः
प्रियः प्रियायार्हसि हेष सोढुम् ॥ ४४ ॥

ऐसे अर्जुने क्षणितले । मग पुडुतीं दंडवत घातले ।
तेथ सात्विकाचें आले । भरितें तेया ॥ ५६० ॥
क्षणतां प्रसीद प्रसीद । वाचा होतसे सद्गद ।
काढीं जी अपराध— । समुद्रौनियां ॥ ६१ ॥
तुज विश्वसुद्धातें कहीं । सोइरेपणें न मनुं चि पाहीं ।
तुज ईश्वरेश्वराचां ठाई । ऐश्वर्य केलें ॥ ६२ ॥
तूं वर्णनीयु पारि लोभें । मातें वानितां सभे ।
तें मियां साहिजे खोबे । निवातां चि ॥ ६३ ॥
आतां ऐसेसेयां अपराधां । मर्यादा नाहिं मुकुंदा ।
क्षणौनि रक्ष प्रमादा । पसाऊं क्षणवीं ॥ ६४ ॥
जी हें चि विनवावेया लागि । कैची योग्यता माझां आंगीं ।
पारि अपत्य जैसें सलगी । बापेंसि बोले ॥ ६५ ॥
नातारि प्राणाचें सोयरें भेटे । मग जिवें जिये भूतलि संकटें ।
तियें निवेदितां न वटे । संकोचु कांहीं ॥ ६६ ॥
कां उखितें आंगें जीवें । आपणपें दीधलें जिया आघवें ।
तिये कांतु मीनलेयां न न्हावें । हृदय जेवि ॥ ६७ ॥
तिया परीं जी मियां । तुमतें विनविलें गोसावियां ।
पारि आणिक ही एक क्षणावेया । कारण असे ॥ ६८ ॥

अदृष्टपूर्वं हवितोऽस्मि दृष्ट्वा

भयेन च प्रव्यथितं मनो मे ।

तदेव मे दर्शय देव रूपं

प्रसीद देवेश जगन्निवास ॥ ४५ ॥

तारि देवेंसिं सलगि केली । जे विश्वरूपाची आलि घेतली ।

ते मायेबापें पुरविली । जेहालपणें ॥ ६९ ॥

सुरतरूचिं झाडें । आंगणिं लाविसि कोडें ।

देसि कामधेनूचे पाडे । खेलावेया ॥ ५७० ॥

मियां नक्षत्रां डाऊ पाडावा ।

मग चंद्रु चेंडुवा लागि मागावा ।

हा संदु सिद्धी नेला आघवा ।

माउलिया तुवां ॥ ७१ ॥

जेया अमृतलेसा लागि सायास ।

तेयाचा पाउसाला केल च्यान्ही मास ।

पृथिविये लेउनियां तास ।

चिंतामणि पेरिले ॥ ७२ ॥

ऐसा कृतकृत्य केलं स्वामीं । बहू ललां लालिलां तुझीं ।

दाविलें जें हरब्रह्मीं । नाइकिजे कानीं ॥ ७३ ॥

मज देखावेयाची केउती गोठि ।

जेयाची उपनिषदां नाहिं भेटि ।

ते जिन्हारिची गांठि ।

मज लागिं सोडिली ॥ ७४ ॥

जी कल्पादि लागौनि । आजिची घडी धरुनि ।

माझि जेतुलीं होउनि । गेलीं जन्में ॥ ७५ ॥

तेया आघवेया आंतु । घरड हुलि घेउनि असें पांतु ।

परि देखिजे आइकिजे हे मातु । आंतुडे चि ना ॥ ७६ ॥